

清代筆記叢書
叢編

俞樾著

三



薈叢編卷九

清 曲園居士纂

金隱君

金隱君名光字公絢義烏人也少好學凡天文地理奇門遁甲歷律醫卜等書靡不
畢究性好遊居家歎息曰丈夫固踴躍戶庭邪時熹宗時毛帥鎮東江金君附商賈
至其地縱觀海外形勢大喜無何政府感處士策授謀殺毛帥帥麾下枕戈泣又數
見疑斬餉麾下舊部憤曰大將軍死一書生吾屬安向遂掠定長山五島率民兵萬
餘航海歸朝而金君始罹難矣時崇禎甲戌七年即大清天聰八年也南望輒淚下
南人為將領者客金君時諸道統帥智順王等求操觚客卒不得智順王廉知之召
金君智順王者平南王始封爵也金君佯為許諾典書記惡西僧多雜處弗與言乘
間逸去國法嚴笞之百又逃縛而大創之又逃督捕者請於朝將斬之坐金君燾下
帳下爭以酒肉進金君醺酒啖肉大笑曰速殺我吾生不能歸魂歸矣智順王大驚
馳馬至若非金某君誤矣別以他囚殉舍人子流涕謂金君曰王愛公奈何負王金
君悟入謝玉王大悅凡十年王倚之如左右手然南望必淚下喜登高山觀日曛曛

升則大喜。或悲哀雪涕。以頭頓地。人不測其故。一日又出游。西僧躡其後。稍選騎相並望其山形。盡白。山腰懸紅燈二。山忽動。跡之乃巨蟒也。金君驚將返轡。西僧曰。慎無恐。吾命之退。馬上鳴。鳴作梵語。蟒如疾風駛去。金君歸語人曰。吾向惡若曹。繼自今毋輕相天下士。順治元年。王從攝政王及恭順王。懷順王。入山海關。會平西伯兵大破賊李自成。走之。遂入京。金君與俱入關。時策馬歎息。泣下曰。吾曩日冀魂歸。今生歸矣。未知較魂歸奚若。大清定鼎。都北京。更從王定太原。克延安。明年下九江。左甯南全部降。品隲諸降將。數與金聲桓語。聲桓欲得金君。王不許。其後聲桓敗。王笑曰。吾從其請。汝敗矣。金君亦笑曰。聲桓不得光。故至於敗。又明年取湖南。王與諸王會師。咸重金君。王入朝。改封平南王。王欲叙金君功。固辭。己丑。王始與靖南王取廣東。攻南雄。取韶州。襲清遠。降從化。始抵廣州。運籌發策。敵無不知。有金君者。諸將欲屠城。必勸王戒止。凡二年。始克廣州。又二年。定高廉雷瓊等州。戰取疾徐。咸受成算。又明年。大破李定國於橫州。叙平粵功。當同三品。固辭。不拜。金君欲歸隱。王卒不許。王以其子尚郡主。三辭。不允。始成禮。金君歎曰。王遇我厚。失我初願。奈何。吾航海北渡。十有一年。從陸入關。當時不能退。今又幾何時。言未已。淚下。文村者。故明虎貴將。

軍王興所踞地也。處萬山中。左峭壁。右大海。陽為順而實不臣。羊腸鳥道。刺竹叢雜。即步兵短刀。卒不得入。思持久困之一日。興遣卒設罵曰。若陳兵百萬矣。益汝軍中。金先生自來。吾降矣。守陴者以告。明日。復設罵如故。金君聞之。慨然請行。王及旗帥督撫大吏驚曰。變無信。奈何。失金君。金君揖列座曰。光應去。令一騎釋甲前導。傳呼曰。金先生來。村口卒馳告興。興曰。偽耳。令素閒謀者覘之。急奔告曰。果金先生。興命與以入。徑數里。甲兵糗芟山積。興出迎。問曰。君護騎幾何。金君曰。一騎。興曰。君何信我。金君拱手曰。汝先信。吾安敢不信。若登堂。磔折如客禮。王將軍從容言。吾祖宗受約束。為藩籬外臣。於今二百八十餘年矣。曩者藉兵雪故主仇。感泣至再。雖然。興豈為降將軍耶。語未竟。忽一人啟扉突出。則故明侍郎。前兩浙督學臣王公應華也。與金君有舊。相持拜跪。哽咽卒不能語。王將軍設席呼二人曰。且飲。一飲凡三日。王將軍把臂歎曰。君來。興宜踐前諾。命五子出拜。指金君曰。汝曹善事汝父。更酌金君酒。眦目撫鬚。降席請曰。興死矣。興毅魄不死。藉汝大書冢前。大明虎賁將軍王興之墓足矣。金君瞠目錯愕。應曰。諾。王將軍召妻妾登層樓。自爇連珠礮。轟然雷震而沒。越三日。金君攜其五子出。納敕印土田冊籍。降者次第出。金君曰。興獨焚。亦忠臣也。吾

不負死者。勸王請於朝。恤其五子。蠻裔感泣。而金君名益著。金君佐王幕。始終不受官。然金君隱軍中幾五十年。王欲官其子弟。卒不許。登粵王臺。凌風長嘯。謂吾曩時濱海觀日出。今又濱海數觀日出。吾得跳天門。依日月足矣。臨死。嘆息曰。吾少時幾死而不畏死。今老矣。願遲須臾死。願齷齪以死。隱忍五十年。竟死矣。金君未死時。澹歸大師為君作留須臾傳。見林瑞歲寒堂存稿

草薦先生

草薦先生不知其名字氏族。始居豐樂橋南。又徙而之鐵冶嶺。經歲不出戶。一日。客訪其居。童子曰。方卧薦上。未敢通。日移晷。徑披其帷。闚其無人。已而床上有聲。聲效覓唾壺狀。始盤旋下牀。立帳啟露薦。語曰。天寒甚。客從何方來。先生裹氈幘。加以布帽。帽束悅望之。頭上高二尺許。坐語移時。呼童子進酒。衣厚如重鎧。袖臃腫。手不得卒把杯。望其床薦。高於几。迫而視之。計二十八簾。夫牀高五尺耳。受薦二十八簾。簾以寸計。高二尺八寸。受卧只二尺餘。扳而上。如登山。偃而下。如墜谷。勞矣。無何。先生醉。又上薦卧。案上詩文。高與薦等。竊而讀之。似不從人間來。客大笑曰。昔司馬子長好游。故其文日益奇。乃公踞踏戶庭。固於薦上得之者也。先生踞薦。不得坐。忽下牀。

曰客惡知我吾束髮以還日與名公卿賢豪長者相把臂迄於今有蟬蛻軒冕者有山林終者有自髡頂為僧者有小草坐寒氈者有起以大慰蒼生者有墓木已拱久者有餬口四方金盡表敝者有憔悴且行吟者吾老矣猶得卧薦上迨季秋輒益薦吾不意竟益至二十八簾也汝慎無言吾又將卧於是里中人咸呼曰草薦先生云或曰先生毛氏名先舒字稚黃古錢唐人

見林路歲寒堂存稿

夏士友

夏士友江夏人孝子也居保安門外家故寒微十餘歲喪父業雜髮以養母唐氏不足則減己食母之養未嘗缺鄰里有邀食者必先為母市肥甘然後往不忍背母獨美食也每天風寒晨起自炊溫語慰母曰天寒甚無遽起炊熟蒸炭置床前溫語奉母食食畢則又溫語曰兒出市即返老年人須善自愛護無為風所襲如是者二十

年不少懈凡力所獲悉以養母故年四十而猶未有室邑某姓有妾不容於嫡欲嫁之或謂之曰夏某事母孝盍贈焉遂以贈士友士友欣然以為可以代母之勞也居半載士友自外歸婦與姑詬評於室士友淚流滿頰嗚咽而言曰吾安用汝為吾有汝以慰母也汝不能慰吾母吾安用汝為攜至某姓家涕泣道其故而出之後年餘

士友以疾卒。母痛士友亡而悲。已七十之年。之將擠於溝壑也。日夜哭之哀。有張姓者。晉人。僦居於鄰。聞之曰。此老嫗何哀若是。人告之。故曰。嘻。世固有孝子其人哉。世固有孝子其人。而母不得終養者哉。我養若母。且我得與孝子為弟行。幸甚。趨詣其家。匍匐母前。願為義子。月供薪米。奉以終身。見傳以成集。

貞憲先生

貞憲先生姓王氏。諱泰際。字內三。中崇禎癸未科進士。與黃陶庵先生為同邑同年友。陶庵集中有答王研存書。商畧處患難。為隱身不出計者。即先生也。其書中之言曰。吾輩埋名不能而潛身必可得。冠婚喪祭。以深衣幅巾行禮。終身稱前進士。一事不與州縣相關。絕迹恩餼可也。又謂此大關係處。不得不以真語就正。前世如龔君賓。謝疊山。及國朝龔安節。而在其畧。不過如此。噫。黃先生與先生皆非畏死者。苟可以不死而仍不失吾之所守。亦何必以其身委之一燼。士之有君。猶女之有夫也。其以身殉夫者。烈也。終其身守之不變者。貞也。士不幸而遭國家喪亡之日。所出惟有兩途。與夫既嫁而孀居者。何異哉。黃先生既所處在必死之地。而死之得其所矣。先生適當可以無死而完其終身不改之節。一如黃先生書中之語。亦復何憾哉。先

生所居。在縣之六都。家本崑山。遷至嘉定。三世皆隱而不曜。先生三子。兩孝廉。君霖。汝。博。汝。皆居於城。然人罕有於城市見先生者。縣屢舉鄉飲大賓。曰。吾第不死而已。奈何。以此困我。食淡衣麤。三十餘年。以丁卯之冬。無疾而卒。殮以深衣幅巾。如平日所服。邑之學者。私謚曰。貞憲先生。

見張雲章
樸村文集。

菊隱先生

菊隱先生姓陸氏。名元輔。字翼玉。嘉定新涇里人。初就傅。即知向學。既長。取十三經。注疏。伏而讀之。章通句解。寒暑晝夜無所間。嘗夏夜酷熱。斗室中蚊聚如雷。同學者造先生。先生方危坐讀儀禮。執筆丹黃。汗流被肘。呼之不應。因前勸先生曰。鬱蒸如此。盍少休乎。先生曰。果熱耶。吾心入書中不自覺。其勤學如此。明亡。兵至嘉定。陶庵以下。相與抗節。先生脫去弟子籍。分將潛深伏奧。以布衣老矣。而當世大人先生。以其經師。必欲力致之。先生念已於前朝。未有祿仕。出亦無害。而以貧故。餬口四方。亦非不義之粟。故以禮來聘者。先生不之拒。於太倉則太原王氏。崑山則東海徐氏。南陽葉氏。長洲則廣平宋氏。而東海公乾學。力趣先生入都。則又有宛平王公崇簡。孫公承澤。蔚州魏公象樞。江寧王公宏澤。皆虛已授餐。或俾子弟執經焉。先生所主。既皆

海內巨室大家發其藏書。益資宏覽。每擁皋比。則前後書卷。屹然如城。手披口吟。午夜不徹。又往往徧借異書。手自繕錄。腕脫不倦。積多至千卷。先生於是遂博極天下之書。康熙十七年。詔舉博學鴻儒。前大學士吳公正治首以先生名薦。州縣敦迫至京。先生念異時師友嘗抱隱痛。又既棄諸生。不欲違初心。召試說不入格。又多規切語。主者得之。不敢獻。然先生輩三四人。諸公雅重其名。因奏未與選者。年近七十以上。加中書正字等銜以寵之。時先生年六十有三。具以實對。遂罷去。先生前後客京師。幾二十年。諸公貴人爭羅致之。慮不可得。海內魁士名人咸欲就先生質經義。天子嚮意儒術。累召文學侍從臣。親試賦詩。記說箴銘等。或有所徵用。故實欲考其所從出。或時被顧問。懼不能對。咸退而諮先生。先生為具道某書某事。輒舉其詞與其首尾。即檢書以驗。無一誤者。士大夫相語。往往稱陸先生。雖不舉其字。而知必其人也。東修所入。大半用以購書。在京師有書數千卷。力不能致之家。以是欲去而徘徊者二三年。既歸。貧不自給。復館徐公家。所著有十三經注疏類鈔。續經籍考。明季爭先錄。蒲隱紀聞。及文集各若干卷。先世本姓王氏。曾祖松。撫於陸氏。遂冒今姓。張

唐復思

宋介山有唐復思傳云。唐復思。閩人也。不知其出處。國初往來嚴州之淳安。遂安諸山寺。康熙十九年。余嘗遊遂安。見僧舍郵亭。多有唐復思題壁。書法老縱。詩怨排。孤放而不自容。知其為高隱者矣。明年。余復至遂安。一日過同鄉程廷周家。見席中一老人豪飲。而巨顙豐頤。長目顧盼。程更出圖畫十許幅。請老人南嚮坐而題詠。老人則執筆岷然起視之。則真七尺古丈夫。署紙尾則曰唐復思題。余始驚。即唐復思也。為人巖立不倚。惟放廢於酒。遂人言其初入懸南門也。已沈酒矣。僧伽帽。插花袒臂。欹倚歌道中。而人既闕。產鳥言嘒嘒。時山谷猶多警。門者以故縛之。縣令則陰察其非常僧。而陽以為醉僧也。笑釋之。由是遂常游食於瀆遂之諸山寺。至甲寅。滇閩大亂。而瀆遂之地。年餘忽不見唐復思跡。及歸。乃云自秦中來。縉紳之徒。因疑其志異。稍稍謝絕之。余自程廷周家識先生後。明日過訪之。往還既數。而先生有攜杖童子。漸與余習熟。因微以先生事跡之。童子曰。我不知吾先生。但常見其中夜起視星氣。有時或哭。而其枕匣有大銅章一。閒嘗啟匣手弄。秘之。不知何為者。余意童子則未賭官司符篆耳。然則先生固前朝仕官者耶。又一日過先生。先生病。更暴作心痛。見

余至。瞠目而視曰。復思死矣。恐死而世不我知。然復思非我名。而唐則我外家姓也。余為烈皇帝御覽進士。言至此則淚。又曰。後仕宏光。語未絕而適痛稍差。遂不復言。固問其姓名。亦終不答。先生病愈。乃去。遂而之瀉。二十九年。先生又在臨安。臨安之廣文集。謂先生即莆田之進士林鐸云。規宋和雪晴軒集

黃道本

黃孝孫。道本者。武昌人也。字羽南。始名士鵠。以夢其祖母。易今名。當其祖母死。孝孫目泣血。浸至嘔血。病三年矣。其祖母夢之曰。孫。易名道本。則壽可五十五。是時孝孫年十九也。年十六。即刲股療祖母病。著孝。先是。父母舉孝孫。輒夜啼。母抱之久。且急。一夜啼更急。母與父時。皆年十五。至是其祖母過。而讓其婦曰。老姑豈易得孫。而少婦殊不難其子也。遂自抱乳孫。至去乳能言。即口授孫論孟。孝孫年二十。即以幕游。今四十矣。嘗曰。道本以貧而託於幕。雖寡學問。然頗知大義者。以從乳口中。熟祖母訓也。當祖母病篤時。其母亦病。孝孫思刲股以療祖母。乃私草一疏。告母竊見疏。草泣曰。我婦兒孫也。吾當割。欲抽刀以割。孝孫泣曰。母病何堪割。且兒即母也。請易割。於是母子皆未割。而心相防。頃之。孝孫託宿外館。延醫。竟割股。當引刀下肉時。則頭

目昏昏仆地一人俯而曳之起鬚尚被其輔頰間蕭蕭也反顧忽不見明日和藥以進而祖母夜已死以館宿去家遠不知也至則始聞號泣聲入視之尚微一息乃以藥投之竟蘇孝孫念曰吾股一割且起死再割不愈病乎遂夜宿城隍廟案間漏再下矣抽刀割若有物肘之者遂撲地不省及覺則五鼓曙孝孫喜曰神不我割病當愈因復筮卜亦云愈至家其祖母果稍愈無何忽病篤竟死孝子痛神之誤之也故目泣血浸至嘔血病三年云

見宋和雪晴軒集

義行李叟

李叟振陽諱生春商邱人薄有田廬力耕而好義有從伯者善治生銖累所積至八百金比疾革趣召叟至則無所語如是者數終不及語而卒叟奉諱往赴則管造者迎哭戶內已而指橐中裝謂叟曰此汝伯終身所蓄也遺命畀汝與爾兄平分之向之所以屢召汝而終無言者為此耳叟聞之哭曰伯雖無子固有女在此八百金皆伯父忍嗜欲瘡手足所經畫而積貯者也豈不欲有子而遺之不幸終無所出而至於大故顧以義割恩不畀其女而畀某兄弟某何心私擅之昧義而傷伯之隱向之所以數召而終無語者固命我矣願以某所應分者均之二姊焉及兄至奉其半以

進而告之故。兄曰。汝能是其以我為獨匪人耶。其悉輟以資伯女。勿更言受金事也。人嘗售宅於叟者。質劑既立。予之直矣。乃不責以移居。逮數歲。聞其家有閔牆變。察知其由。蓋以移房故。叟置酒召其兄弟曰。野人幸有數椽。避風雨。忍使同氣異宮。而交相為瘡乎。因折其券棄之。曰。汝兄弟其終有此毫末之值。卿供伯仲一日歡。其後留遷嘉善。有負其貨至數百緡者。計無以償。謀鬻其子之夫婦以辦。叟遽止之曰。奈何以抵債傷父子恩。勿庸其人。謝曰。公德我良厚。無以報。即輟子夫婦終事公。叟曰。欲完人骨肉而自有之。是陽義而陰為利也。余豈忍出此。揮去不顧。叟之重義輕財多如此。見田蘭芳逸德軒集。

寒支先生

先生李姓。勝國諸生也。甯化泉上里人。名世熊。字元仲。自號曰寒支子。自經史子集。以及秦漢唐宋近代百家。靡所不覽。獨好韓非。屈原。韓愈之書。故其為文。沈深峭刻。雄偉淒麗。奧博離奇。雖非盛世和平之音。蓋自稱其所遇也。時當天啟崇禎間。若預知有甲申以後事者。每論古今興亡。儒生出處。及江南北利害。備兵屯田水利諸大要。未嘗不慷慨歎歎。惓惓有所屬望。大清定鼎。閩中尚擁唐王。未歸命。故大學士黃道

周何楷並薦寒支尚志博學徵拜翰林博士不赴丁亥王師入閩序應歲貢辭自是杜門絕迹城市有齟齬於郡帥者帥遣某生移書逼入郡寒支復之曰天下無官者十九豈盡高士來書謂不出山慮有不測之禍夫死生有命甯遂縣於要津且余年四十八矣諸葛瘁躬之日僅少一年文山盡節之辰已多一歲何能抑情違性重取羞辱哉時蜚語騰沸勢洶洶不測寒支矢死不為動疑謗亦釋寒支既以文章氣節著一時名聲大震辛卯壬辰間建昌潰賊黃希孕剽掠過泉上里有卒摘寒支園中二橘希孕立鞭之駐馬園側視卒過盡乃行粵寇至燔民屋火及寒支園其魁劉大勝遣卒撲救曰奈何壞李公居室是時天下人雖盜賊亦知有寒支矣乙卯耿精忠反遣偽使敦聘絡繹踵門寒支嚴拒之自春徂冬堅卧不起乃得免寒支自甲申以後山居四十餘年鄉人宗之晚號媿庵顏其齋曰但月年八十五以疾卒於家

鼎元
洲初稿

丁隱君

丁隱君名敬字敬身號鈍丁自稱龍泓山人家在候潮門外鄰保皆野人也釀麴藥自給身廁傭販未嘗自異顧好金石之文窮巖絕壑披荆榛剝苔蘚手自模搨證以

志傳。著武林金石錄。分隸皆入古。而於篆尤篤嗜。秦漢銅器。宋元名跡。入手即辨。性
耽羣籍。家貧不能出重資購買。門攤市集。眼光所駐。無留良焉。小樓三楹。扇足滿室。
皆異冊也。詩學其所專長。布衣金農相距一雞飛之舍。與之齊名。美辭秀異。敬或不
及。鋪陳終始。豪放不可羈縻。農不能逮也。寒人張沅字畏廬。號戲邱。老棲荒江之上。
兀傲自負。敬與酬和。疊險韻至無算。而氣不竭。故談藝者以城南為詩國。閒房冷利。
青林丹嶂之區。足跡無不到。題詠無不及也。鄰人不戒。炎及其廬。所收蓄皆盡。而樓
亦燼焉。方制府觀承。愛其鐵筆。媚制府者欲得其一二方。通意指。而惡聲殷牆。屋驚
而逸去。江苑卿春慕其詩。將之武林。以幣贖。謝勿與通。晚買宅於張紗街。將遷矣。而
以母柩先往。親串有以不吉告者。勿為動。曰。吾母不及見也。未幾竟死此宅。見杭世
駿道古

集

孫夔臣

孫孝子夔臣。先世居江南休甯之桂里。父學詩。遭亂數遷。定居常熟。遂為常熟人。孝
子生三歲。生母程沒。育於女兄。稍長。隨父讀書虞山中峯寺。冬歲盜入。攫衣物。孝子
驚起。獨身追之。盜顧曰。兒不惜命耶。孝子曰。父凍且死。敢惜命耶。盜聞言。擲一被去。

父病水蠱。孝子日為父摩腹。口就臍吸之。歷數月。病良已。已復病泄瀉。中裙廁。皆親自澣灑。不以假人。先是孝子母沒時。其父未有定居。既家常熟。乃使人改營宅兆。承事者。說云。遷葬已畢。及孝子往省。竟不知母墓所在。於是慟哭。行求哀感。行路有告以桂里宗祠粟主。例書生卒年月及殯所者。孝子匍匐入祠。祠主積多不可辨。而亡失者。亦往往有之。存否不可必也。且拜且慟。慟絕不能出聲。宗老急呼之。甦曰。墓在墓在。孝子張目持告者曰。墓安在。即謬應曰。主在東廡。得主即得墓矣。至東廡拜捧一主。果孝子母也。族眾咸歎息稱異。既啟視。知母厝東門路旁園中。孝子悲號撫臆。捧主就墳。露處者累日夜。又以去家遠。乃即其地買田。供祭祀焉。孝子生不識母。哀思特切。有從母金。與母相依久。每命畫師畫像。質之於金。歷久弗克肖。孝子念從母老矣。脫不諱。誰省識者。中夜徬徨。涕泗交下。詰朝畫師持畫至。曰。昨夢一婦云。至自桂里。醒憶所見。亟繪以來。金見之曰。似矣。目未肖也。孝子喜且泣。越數日。畫師復夢前婦曰。我孫女貴孫。目肖我。貴孫者。孝子同母兄之女也。旦述以告。即重畫示金。金顧孝子泣然曰。此何肖汝母之甚耶。孝子泣。家人聚觀者亦泣。鄉里聞知。翕然稱為孝子孝子云。

見寥鴻章南雲書屋文集

鐵脚板

鐵脚板者。眉之鄙人也。姓陳名登皞。生有膽識。膂力過人。家貧。獵獸自給。常赤足逐鹿豕。奔新斬叢竹中。里許而足不傷。人目之曰。此鐵脚板也。登皞曰。呼我甚當。於是足不著履。行膝止。及脛。終身如常。獻賊據成都。遣偽將耿三品等略眉。先期傳示云。除城盡勦。民不悟。攜老幼入城。乙酉正月五日。賊驅城中人至原田。上盡殺之。又搜戮四方居民。登皞突起。忿言曰。洗頸待死。與抗賊殺死等死。奈何袖手待盡耶。遂裂白衣為旗。招各山亡命少壯。大書於上曰。敢與殘忍流賊張獻忠為敵者。從我。數日內。不期而集者千人。登皞持獵械。負柴弓竹矢。赤足先趨。千人者各執白楛。相隨據城西醴泉河。斬木立柵。標所書白旗於前。名曰鐵勝。鐵勝者。取已勝賊之義也。遂與賊持。前後殺獲甚衆。賊大懼。取道潛移東館。登皞又令民兵數百。具羊酒偽為投順者。賊帥納之營中。夜半。登皞率衆大至。鳴金鼓。火攻賊營。數百人從中噪而應之。內外夾擊。賊衆大亂。死者不可計數。乃遁去。於是眉之多月鎮。斑竹王二郎壩諸村。各聚衆自守。皆名其營為鐵勝。賊聞之。不敢逼。而鐵脚板之名大播南川。嘉定向成功亦起師拒賊者。有衆五千。欲節轄登皞。不從。率兵圍之甘溪口。登皞勢弱。不敵。力戰

死之成功駐兵石佛點。修木城鑿濠塹。招集三萬餘人。分五營四哨。抗拒官兵。丁亥三月二十八日。我朝肅王以大兵至。攻破木城。成功中流矢死。其黨乃平。見彭道四集

唐肇虞

吳縣唐孝子肇虞。字順江。父歿時。孝子尚幼。執喪如成人。晝夜哭不絕聲。母止之。孝子曰。母哭能禁兒勿哭耶。家故貧。母以女紅佐薪水費。孝子見之心怛怛焉。恨不得致甘毳以養母。使母自勞苦也。稍長。治生理。晨夕色養。母樂而安。明政不綱。四方盜賊竊發。甲申。世祖皇帝定鼎燕京。而江南土寇獨未寧靖。所過劫掠一空。孝子奉母遁山谷中。行數日。倉卒遇寇。失母所在。孝子呼天號泣。誓不獲母不獨還。遂徧訪村墟邑井間。無影響。旁及他郡縣僻地。亦無知之者。時兵燹四起。孝子宵行晝伏。屢與寇遇。僅而獲免。渡江而北。復從北而南。足跡所經。凡數千里。再歷寒暑。風餐露宿。艱苦備嘗。孝子體素羸。至是憔悴骨立。非復人形矣。會天下已定。避難者稍稍復城市。一日孝子過金陵。衆以其形之異也。詢所自來。孝子泣以實告。有一嫗前問曰。若母非戴姓耶。孝子曰。然。嫗引之歸。則其母在焉。且喜且悲。相持大慟。旁觀亦為之墮淚。孝子侍其母歸。又十餘年。母以壽終。孝子壽亦永歿之時。年七十有三。子若孫皆克

有成立。

見倪承汝
頓塘集。

蔣適園

公諱堅字非磷號適園江西鉛山人精法家言諸侯爭迎之代州有大獄囚纍纍牘可隱人撫軍檄寄嵐牧甘公辨治甘聘公往讞立具殺七人釋無辜者百八十八酒姓娶婦月餘弟迎姊歸將入村失姊懼反誣酒氏官下酒氏翁於獄七年不決公從太原返吏指前樹林曰此酒氏家也公心動駭馬而之乎山凹有人局戶博矚之一兒覺異拍髻者肩告之衆咸喏曰鬼耳人則安能來公馳歸白甘公篡取鉤距果髯者所略也臨汾令某縱吏暴征民變棄家登山撫軍檄澤州牧佟公辦治聘公行日驅三百里至平陽能屬者裁四騎山上人如蟻螻樹鉤鉏為兵張旗洶洶公手令箭而先周山呼曰撫軍知爾等良也為奸胥逼反特遣佟使君來活汝宜各甯爾家有目者視此箭山上人禁聲稍稍下公導餘騎入縣廷瓦礫山積令從夕室出率犯法吏六人跪佟前民環門而囂欲毆之公叱曰勿妄動有王法在乃榜吏於庭血流民懽噪拜謝去次日四鼓牽官吏詣省白撫軍撫軍大悅飲佟酒而手炙鹿尾啖公公幼即以智俠自居七歲隨叔父詣法雲堂聽僧誦經廡下坐縣捕數人私語某寺僧被殺

主名不得奈何。公辟耳於叔曰：殺人者堂上老僧也。叔訶之曰：渠誦經屢願不在經矣。故疑之。捕者牽僧去。一訊而服。十七歲阻風瑞洪鎮。有少年同舟。舟人哺食。少年登岸。再食再登岸。公疑而跡之。見其蹲古廟大鐘下。色燦然。瞳也。曰：余南昌熊白龍家貧。告急於河口。感不遇。反寄食於舟人。未償其值。而又阻風。舟人將不余食焉。故避此語。畢。公亦泛疆入舟。與共食。而資以金。熊感謝歸。邀過其家。見母。誓為兄弟。居亡何。熊來曰：權弟金獲利三倍。今將販繒臨安。無所託。母妻故來。弟知吾父有養子。曰蛟乎。素無行。脫有故弟善持之言。畢去。逾年。繒主人執訊來曰：熊某死矣。餘金若干。目且瞑。屬曰：為我報蔣君。公陰念歸熊喪。非蛟不可。而蛟見金必叵測。乃札覆主人。授部署法。遲十日。告熊母。母果遣蛟往。已而召公哭曰：蛟至浙。兒骸已焚。闔然。在桶。舟人負之納我圃。此外不有其藏一錢。奈何。公慰母再三。而身自往圃哭視。畢走出。母牽公袍曰：聞繒主以兒金寄君。金之來由君。然貿易者與有勞焉。盍析半惠老身。公未答。蛟突前。脫曰：須南昌廳事明之耳。公叱曰：何必南昌廳。召二三鄰父來。即明也。蛟嘆喏。扁公去。俄而龐眉者六七叟至。公曰：所以囁嚅者。受亡人託。防蛟故也。防蛟為母故也。今母見逼。不得不速明。請詣圃。乃繞桶而號曰：白龍知我。白龍

知我斧之。複底脫鏡三具墮地。光瑩瑩然。鎔金也。裹以簿券。眾取視。感泣歎。老嫗目
昧不知人。未幾。蛟果竊金遁。公有神力。而敏於為善。遇盜許昌。兩騎截路中。五行行
劫。公怒。射一人顛。再發再顛。盜驚。舍所劫者。搏公。公縱馬入刺。殺一人。馬逸。公仆。躍
起。復殺二人。餘盜乃竄。被劫客為公牽馬出林。羅拜問姓名去。又嘗行岢嵐道中。兩
峯夾溪。天暴雨。泥沒馬鼻。有婦抱兒騎。一童子負策從。公慮其溺。救之。非錢莫以也。
乃解數緡挂馬首。須臾。婦溺。童子驚亦溺。公大呼。救者贈錢萬。括其繩。錢鏘鳴。塗人
應聲往。皆掖之起。送甯其家。公四十六歲。始娶鍾夫人。生子士銓。官編修。公捐館時。年
七十一歲。猶及見士銓舉於鄉也。見袁枚小倉山房集

侯夷門

天台侯嘉繼。號夷門子。字元經。詩文迅疾。十指雨下。字跡旁行斜上。如長河堅冰。風
裂成文。莫知條理。而天趣可愛。先受知於督學帥公。貢於鄉。連試不售。出為主簿。調
江甯丞。既不得志於時。愈自縱。一日大醉。登報恩寺殿。摩古佛羅漢數百尊。各贈詩
萬餘言。書其頂。箕坐大嗽。窗外風雨暴至。電光燭其手。益喜。奮筆不能休。且吐且書。
取殿旁石。白戴頭上。折旋舞如風。眾僧疑為鬼神異物。不敢逼視。酒既醒。雷雨亦息。

觀其詩奇字異句不能讀也。舉其曰：重二百斤。鎮江黃太守慕其才，招至署，未浹旬，早起不見，覓之，赫然死廁旁。見袁枚小倉山房集

劉刺庵

劉先生永錫，字欽爾，號刺庵，魏縣人。中崇禎丙子鄉試，癸未選長洲學教諭，署崇明縣事。庭無留獄，未幾遭鼎革，隱居相城，有文吏造其室，欲強之出，先生袒裊疾視曰：我中州男子，年二十，渡漳河，登大伍，躍馬鳴鞘，兩河豪傑，誰不知我，乃以此相逼，將謂我畏死邪？取壁上挂劍，欲自剄，門人抱持之，得解，尋移居陽城湖之濱，妻栗氏，子臨，女貞，織席以食。先生攜席市中，見者呼席先生，食不繼，時不舉火，有遺之粟者，非其人不受。有老奴從魏縣來，勸之歸，曰：室廬故在也。先生曰：我非不欲歸，奉君命來，此義不可歸，命其子同老奴歸，謂祖宗邱墓責在汝，麾之去。時歲荒，得食愈艱，每雜糠粃作飯，妻病不能下咽，竟餓死。先生未之長洲也，以女許字同邑某氏子，某氏宦於粵，音問阻絕十餘年矣。至是請於父，曰：兒不辰，遭國家之變，翁家生死存亡不可知，留其身為大人累，無為也。遂自經死。其子同老奴歸，傷於盜，墜車折臂，歸即死。女死之日，問適至，先生既無家，買一破船，往來江湖間，嘗泛舟中流，鼓柁而歌曰：白日

墮兮野荒荒。逐鳧雁兮侶牛羊。壯士何心兮歸故鄉。風水蕩激歌聲甚。邇聞者哀之。某尚書念其窮。招之往。先生曰。尚書為黨魁。受主眷。枚卜時。天子以伊傅期待。彼豈忘之邪。卒不往。志老而彌堅。訖窮餓死。弟子徐晟。陳三島。友人陸滋。經紀其喪。葬先生於虎邱之山塘。晟字禎起。三島字鶴客。長洲人。滋字秋玉。常熟人。皆志士。滋無家。圖已像於水墨尺幅中。自號水墨中人。見沈德潛歸愚文鈔

張士仁

孝子姓張。名士仁。字奉田。崑山雪莊里人也。父文元。母蔡氏。孝子方六歲。母病篤。號泣籲天曰。願減兒壽。活我娘娘。叩頭流血不止。見者哀之。母病旋愈。年十三。與父同寢。父醉卧。有仇家預伏牀下。孝子忽心動。起剔燈。仇露刃自牀下出。孝子呼父不應。遽以手當之。指欲墜。度不能免。乃涕泣延頸求代。仇感動。擲刀於地。呼其父醒曰。爾有此子。吾不忍害爾也。父惶遽如夢中。良久始定。兩人矢天日。釋怨如平常時。母歿。孝子哀毀過禮。三年中枕席血痕斑然。已而父娶後母。李母性下急。小不可。洗漬疊加。孝子跪而解。不得即不起。母怒解。乃起。久之。母化而慈。撫之如己出。孝子嘗於冬夜遇火災。從鄰起。延及寢室。倉皇中負其父出。復冒火入。負其後母。母復抱幼子。力既

不勝。煙焰迷目。幾不能出。忽運風回。火俱無恙。先是孝子父以力農為家。家漸起。能恤其族黨里人。然以不能徧及為恨。至孝子治田。尤有法度。每歲入倍於尋常。家稍贏。凡姻族婚嫁喪葬。力不足者助之。無力者代之。鄰里有以無業及急難告者。應之至於賑飢者。衣寒者。藥病者。棺殮者。至老不衰。當事行憲乞之。典時論謂有孝有德。盛世所重。欲舉孝子。以光大典。孝子堅謝之。年八十五歿。現沈德潛文鈔

謝振宗

謝孝子名振宗。字奕超。會稽人。山西稷山令雨亭公兆龍子也。雨亭公去任。囊無贖金。亦不負人錢。平陽守馮國泰。奕超婦翁也。居官豪放。病卒。侵官帑二十萬有奇。傾家資不足。抵株嫻黨乞貸者。馮氏媳誣指稷山三萬金。按無左驗。媳曰。婚家耳。通財需左驗耶。牽連質證。時護晉撫高成齡鍛鍊之下。雨亭公稷山獄具。奏立限追繳。踰期予大辟。限將屆。禍不測矣。奕超年二十餘。誓以死救父。瀝陳冤狀。莫為省視。雍正七年三月某日。冒死進天安門。攀石柱。袖椎擊落石獅首脊。守者驚起。執訊之。奕超曰。無慮。我逸也。父冤不伸。來觸禁死耳。甯避禍邪。出冤狀。累累數百言。即日上聞。天威大震。越日。命往黑龍江充當苦差。議者謂奕超無生理矣。聖恩寬處若此。其有以

感聖心也。踰年。馮氏所誣金。邀豁免。出雨亭公於獄。奕超抵配所。上自將軍都統下。訖小吏旂民等。知奕超以救父得罪。稱謝孝子。謝孝子。奕超心懷父母。無一日釋。乾隆七年。雨亭公凶問至。奕超哭曰。天乎。父死不得奉含歛矣。熒熒老母。誰為供菽水者。悲痛之聲達戶外。聞者無不泣下。將軍傅公森廉其事。憫其情。謂都統卜公巡察富公曰。謝某以孝得罪。與衆殊科。皇上孝治天下。我不忍孝子老死沙漠也。無慮格於吏議。具疏代為陳請。疏上。奉旨。謝振宗准其回籍養親。朝見許集

清曲園居士纂

祝曰三

祝曰三。佚其名。故相國高公宏圖家僮也。明亡。相國時已致仕。寓會稽野寺中。聞變不食。家人環泣請不顧。已而開目索飲。祝年十二。侍於旁。進曰。大人幸復食飲。祇可惜枉餓過三日。公頷之。遂閉目。絕粒九日卒。相國之支族將軍文焜。微時與祝兄弟交。命子孝廉某呼祝為丈。往來侍酒。跪起如子姪。將軍都統江西。孝廉初得舉。偕貴家居。廣開亭館。置姬妾。日夜飲酒高會。將軍年老。思子不時至。親友皆勸駕。久之未。有行意。祝聞之。晨往。孝廉飲倦。卧敬枕。使兩女子捶臂。召見祝坐對床。都不言。但吮喉高歌。蔡公思子一闋畢。遂趨出。孝廉即日束裝。祝隨至南昌。將軍歡甚。贈衣一襲。精於繪事。寫人物如生。鄉人重其義。所至延為上客。見法坤宏鏡野文集

嘯莊先生

先生諱廷翼。字虞鄰。即墨人。晚慕阮嗣宗之高致。自號嘯莊。世父副都御史琇。世所稱華野郭公者也。公中年無子。愛先生聰慧。立為世嫡。晚乃舉二子。公連疏權貴。直

聲震天下。公歿。二子方提抱。權貴黨。誹謗騰興。先生懼。謀所以自全。乃痛斂圭角。黜聰明。一意放浪於酒。年甫三十。絕意仕進。築慕雲樓藏書。閉門誦讀。言不及世事。客至。飲以酒。自飲巨觥。為一隊。座客以次角。製酒牀。出飲他家。則昇牀。以隨日暮大醉。昇而歸。以為常。乾隆某年。天子錄用故大臣子孫。先生仲弟廷壽。以孝廉起家。知嘉興府事。幼弟廷翁。舉辛酉孝廉。公去世久。謗。先生亦積然老矣。晉司馬昭。歷論朝臣。獨許阮嗣宗為至慎。余於先生亦云。

見法坤宏鏡野文集

汪霖

汪君名霖。字雨蒼。號榆園。歙西巖鎮人。身長不滿七尺。英毅精悍。雖強武者遇之皆自失。常游武林之西湖。眾無賴子弟數十百人。方劫持一新安客。勢洶洶。張甚。薄視之。則故人也。君怒。奮臂直入。翼故人。縱橫出數十百人中。數十百人咸自盪擊顛路。股栗匍匐。有僵不能起者。君顧視大笑。徐把臂去。又嘗渡錢塘江。潮怒舟沒。君攫身入巨浪。左右騰躍提擲。盡出溺者。排岸觀者如堵。呼聲若雷。皆以為神人。於是人爭傳君材武。有願奉千金請授技者。君麾之去。自悔曰。以拳勇名。非夫也。終身不復言技擊。性好客。善飲。飲酣。縱談前代興亡。治亂賢奸義烈事。輒抵几慷慨。若不自勝。坐

客皆竊竊訛歎。以為狂。君既不遇。生產日薄。一日。婦脫頭上簪。易斗粟。市人倍與之。君曰。誤也。歸其贏。冬夜行市中。見裸卧而呻於途者。即視且斃。急歸持所覆衾覆之。然家故無餘衾也。晚歲縱情詩酒。山水閒。或童冠者舊雜坐。竟日燕笑。無倦容。時復曳杖獨出。意行無定向。偶過村巷籬落閒。聞吟誦聲。輒低徊駐聽。聲寂乃去。葺一椽。劣可容膝。課其子。手書為善最樂。讀書更佳。八字顏之。指謂其子曰。此吾志也。汝其識之。年七十有二。以太學生考授州司馬。卒於家。孫百名。乾隆癸未進士。見鄭虎文吞松閣集

姜瑤

滇有孝子。曰姜瑤。其先江南人。愛岷峨山水。築園於南河濱。遂家焉。代有聞人。而清可公尤善詩。瑤父文柄。詩人清可之裔也。性嗜飲。每貿易得錢。輒償酒債。瑤痛母早逝。事父先意承志。竭力供子職。無缺。娶趙氏。生承宗。承先。趙故繼娶楊氏。賢。克相夫志。相與操作。養親。親嘗遠出。久不歸。音信闕寂。瑤感甚。乃訣妻子。裹糧周尋。遇父於元江。相持大慟。勸之歸。乃喜。家貧。析薪治圃為養。先儘父酒資。餘膳家。晨出採薪。必挈壺置肆閒。反攜酒刈蔬。妻潔治以進。閒或因事偶滯。疾歸。妻楊已命子取酒奉親矣。厥後家益貧。父為罷飲。屢勸不聽。命子承宗跪請曰。孫力能負薪矣。吾父給衣食。

孫供祖飲裕如也。祖非飲不樂。奚自苦為。翌日。適山樵採買酒以歸。共勸酣飲。嗣日習以為常。及親沒。春秋祭。提父嘗飲。壺薦酒。哀慟墓前。楊氏卒無子。又娶關氏。生承澤。聰慧能讀書。有其先清。可公。夙承宗。承先力。圃謹事。瑤瑤五十壽終。今人過南河。稱其圃為孝子圃。見周於智集

傭者誰

郭昆甫有傭者。誰傳云。北平傭者。不傳其姓氏。但號為傭者。誰云。傭為人勤。誠實寡笑言。氣力過人。日所食亦倍於人。甚見重於主人。主人者。都御史魏公也。傭有兄一人。貧失業且老。不能自存活。往依之。食主人食。既數日。傭心獨念。兄非己無所得食。己且為傭食於主人。主人以己故。暫食兄。兄食主人食。無功。義不以己兄故。多食主人食。而已非主人食。又無所得食。兄乃亟請於主人。計其常所食之數。出粟自爨。減其食之半。以為兄食。又時取其傭之直。節省之。具肉食為膳。常少。度不得皆飽。膳具則託以事出。令兄前食。食已。乃至。啖其餘。兄或不留餘。輒以草具自飯。其兄安之久。之。兄乃以肉食可常繼。間一不得。則怒且詈。人所不能堪。傭前謝焉。顏色愈和。事之數年。終不改。兄亦如故。於是人皆稱傭之賢。而以兄為非人也。宗伯方公曰。彼兄乃

真賢者也。夫外人德之可也。吾弟德之不可也。彼惟不外人其弟。故以食之得肉為常。其得之是弟之能事我也。安之也固宜。其不得之是弟之不能事我也。怒且詈之也亦無不宜。如傭者。豈不謂賢乎哉。猶全乎人者也。全乎人之與全乎天者。相去遠矣。見郭煇集。

鄭賓日

常州之鄭。初在南唐保大中。有本初者。自新安仕晉陵。卜居郡西北江濱。曰鄭港。二十三世琢庵公章。為邑諸生。生三子。長曰之罕。字展宗。又字賓日。世為武進人。六歲大父留耕公授以小學。問兒喜書中何句。對曰。仁者不以盛衰改節。義者不以存亡易心。大父奇之。留耕公之妻憚。有段氏妹。以其孤女孫。約為昏姻。故君聘於段。已而女患風病。右肱折。右足跛。欲辭婚。君甫九齡。父詢之。對曰。是不歸兒無歸矣。曰。後得無悔乎。曰。大人義不以孤女負諾。兒忍負心耶。年十九來歸。踰年患目疾。遂瞽。段勸君買妾。君不肯。琢庵公笑曰。予嘗以劉得之取瞽女為難。不意汝今能之。越二年。段卒。父為繼室於卜。廟見後。即令謁段之墓。而迎其母。願養之終身。卜氏以田六畝歸君。曰。母遺命也。君卻之。年三十一。入府學為諸生。授館於外。所得脩脯。養親及兄。

弟之子。為從兄弟授室。無私財焉。妻卜卒。遂不娶。先是族人修譜。遠引漢康成宋沖素為始祖。而削本初公以下十一世。琢庵公力爭之。不得。至是君命其子環更正之。曰。不敢誣其先也。君嗜學。工古今詩文辭。與同縣劉文定公為老友。文定以宰輔家居。過君。竟日談。君猶呼之曰世兄云。見朱珪知是齋集

翁運標

翁孝子曰運標。父惺庵。餘姚諸生也。孝子父好遊。其後遊死於楚。而家人不知。以為遊故自若也。孝子無他兄弟。有姊一人。其家恐并失孝子。往往禁孝子求父。孝子求父。經年不遇。輒追孝子反。孝子娶婦有子。成進士。終不能自抑。一日心動。告母曰。兒不得父。兒不活於人世矣。母抱孝子而泣。孝子去。求父五年。無所遇。徬徨泣於路。路人皆憐之。往宿南嶽。嶽神啟孝子。孝子如神指。抵道州新塘。遇老父焉。老父有弟覆舟。幸附流屍不死。德而葬之。留屍物為驗。老父出驗。而流屍者。果孝子父也。一市皆驚。孝子後分巡道州。建父祠新塘。朔望祠。見朱仕瑋梅屋居士集

項為楷

項孝子名為楷。字端培。歙南文公舍人也。父一浴。字鑑亭。客荊州。產素豐厚。性豪俠。

翁達好。施母程氏。誨子尤嚴。慈備至。是時孝子年僅十四。齡其兄為模。年僅十七。壬申春。母年三十八歲。病且殆。呼兩兒而泣曰。嗟乎。吾兒慎自愛。吾佐汝。父經營堂構。恨不及享其成。且恨不及見吾兒之樹立也。是時兩兒晝夜侍榻前。及母歿。欲偕居墓側。曰。吾兩人不能隨吾母於地下。忍使寒煙冷露。棄吾母於荒原乎。既而孝子沉思良久。謂其兄曰。吾兄弟皆依母塋。善矣。願念吾父客游。誰歟。司管鑰。吾父在室。誰歟。侍晨昏。兄年稍長。可以延賓客。護門庭。弟幼。無能為役。兄侍父。弟侍母可乎。其兄泣而諾。既而殯母於弁山。陽中。孝子線經至墓前。即留宿。不忍去。使人謂其父曰。兒願侍吾母終三年矣。父強之歸。即誓以死。父命人百端勸慰。皆弗從。父亦憐其孝。乃構數椽於殯旁。延師而授讀焉。廬中僅留一老僕。供炊爨。給茗漿而已。孝子朝夕焚香呼母而泣。終歲不一歸。惟元旦造家。至父前跪拜畢。即返墓廬。當夫返照將終。愁雲密合。四山皆亂冢。啾啾聞鬼哭聲。或震雷晦冥。雷雨又至。孝子則跪柩前而泣曰。兒在此。母無懼。每夜分篝燈。則吟誦聲與悲泣聲相聞。行路者皆惻惻動容。非至性之感人。能若是歟。見曹學詩香雪文集

王林屋先生

先生姓王氏名憐字在素林屋其號世居太倉鎮洋縣之東鄉墅溝祖諱珩始入城居南園父香濤公性倜儻喜賓客先生少穎異讀書園中賓至則侍杖履談文考義必中理解老宿咸心折之弱冠補博士弟子員顧性不好帖括嘗下帷默坐為深湛之思暇輒作畫寸練尺素皆有態度既念香濤公年邁冀以科第顯其親乃屈意揣摩至廢寢食入闈日苦心孤詣不苟下一字恒以嘔血污卷被放壬子主司歸安吳牧園得先生卷欲以魁麟經卒以後場一二字駭目見遺自是先生知窮達有命澹於進取益以詩畫自娛詩宗王孟高簡駘宕超然叮咛之外畫於諸大家臨摹殆遍辦香尤在吳興富陽重江疊嶂長林古木鬱勃滿紙而不失清遠秀潤之致京華故交有欲薦入畫苑者先生笑曰余自知才不足用世故寄意丹青奈何借胸中邱壑為終南捷徑耶晚患失聰於人世事都不措念乃一意作畫請乞者戶外屨滿先生亦樂此不疲煙雲供養神采清勁卒年六十有八

見毛詠集

王仲穎

河間王仲穎先生諱之銳號退庵仲穎其字也年十四讀書至吾十有五章瞿然曰先師成童已志大學吾去成童一年耳曾小學之未通乎苦心焦思深自淬礪愛中

庸齊明盛服語書揭卧次夜必整衣端坐或竟夜不寢康熙丁丑學使安溪李文貞公按河郡以課講受知曰南方無此學質也選貢之使從游既攜之直撫幕下七年盡聞文貞性命河洛算數音韻之學文貞入相招至京師第邸與景州魏大司空廷珍交河王少宗伯蘭生偕一日語三公曰盍從我往迎駕熱河乎於時內廷新立東書房集文學才技之士先生心知將薦己也不欲以捷途仕辭文貞心重之不復強己而魏王入內廷癸巳魏捷鼎甲辛丑王賜第皆入翰林先生怡然安之獨與江陰楊文定名時以切劘身心研究經義為務文貞常語人曰從吾游者不啻數千人然而潛心學問不求聞達南楊北王而已其為文貞推重如此館於恂邸王雅敬禮之一日小疾王遣醫來醫者方必首復復出王府先生曰吾疾果非復弗瘳乎醫曰此故事耳復出可弗用也先生笑命去之以纂修周易折衷敘廣東陽春令至數月不能枯槁獲上改教職歸雍正六年里游饑先生家餒困依所親河南確山令適有旨召詣京師將有質豫督不知所緣逮之銀鐺送刑部至則以固無罪也一訊罷遣除萬全教諭乾隆四年趙泰安相國疏薦其學行擢國子助教己巳冬詔舉經學之士梅總憲鼐成何少司空國宗並以疏舉壬申上詢國子耆學祭酒以三人上先生

與焉。召之見病不能行。其二人皆超擢司業。而先生竟以明年謝病。卒於家。見文淵集。

袁昌齡

烏程有剗肝以療母疾而愈者。有司與其國人。咸稱曰袁孝子。孝子名昌齡。事在乾隆四年。時孝子年已五十有二。其母年七十有一矣。方母之疾也。孝子婦已前死。一切煩縟之事。皆孝子親執之。至是醫療百方。卒無效。病且殆。傍徨無措。昏悶中若有告之曰。服龍肝湯。疾可瘳。顧龍肝安可得。忽念己生之年。歲在辰。辰龍屬也。得非神命我剗肝乎。乃潔誠虔禱。夜半扃戶。以刀剗胸之左偏。深寸許。以指剗取。中熱如沸。湯不得入。昏暈而僵。旋似有趣之起者。驚視剗處。肝已突出。遂割之。作湯以進。疾良已。人無知者。越數日。近出過橋。失足。顛於橋下。創裂暈絕。子宗耀亟往。挹持歸。解衣見胸次。束以帛。血斑斑然。漬其上。猶新。請之不言。泣固請。始言之。子倉黃延醫。用善藥敷治。莫效。夜又若有告之曰。服藕汁可愈。如言而創始合。令甘泉羅君慄聞之。親式其間。他日人有訟其子不孝者。有司訊於市。延孝子並兒坐。指以示其子曰。此剗肝袁孝子也。居同里而不知所效邪。杖之。孝子憮然不甯者累日。越十二年而卒。其

母後一年乃終。見盧文昭抱經堂集。

張乞人

張乞人永清縣南門外貧民也。父歿行乞養母。止無廬舍。穴土為居。會天大雪。知縣魏繼齊過其處。聞歌聲出地中。怪之。左右曰。張乞人也。呼出問之。答曰。今日我母生辰。歌以勸餐耳。命車載其母子至官廨。繼齊母餽其母大布及粟。繼齊餽乞人錢十緡。乞人叩頭曰。官母賜我母。不敢不受。官賜我。我不敢受。繼齊曰。與其殘盃冷炙。日夕沿門也。答曰。殘盃冷炙。我母安之久矣。且無所污也。我愚民不知此十緡。官何所受之。我母年八十。我年六十有一。為官清白。百姓足矣。繼齊慚汗下。不復強授焉。為營室於城內金花巷。將命居之。乞人負其母去。不知所終。見趙佑清獻堂集

姜元凱

姜孝子名元凱。華亭人也。五六歲往來親黨間。與之棗栗。輒勿食。問其故。曰。我以奉父母也。父游京師。奉母家居。晨入學。必執書囊依膝下。既問安。然後去。暮歸。牽衣侍側。或誘以嬉。不一動。比歲。疫繼疫。孝子默禱于神。方夜讀書。聞空中語曰。里中有孝子。勿可犯。時道路死者相枕。與孝子為鄰者皆無恙。一日隨父渡江。中流暴風。舟幾覆。孝子哀慟籲天。忽若有挾之。以登岸者。人咸以為至行所感焉。聖祖南巡。內大臣

馬公扈蹕至松館孝子家欲挈之往京以親老辭未幾其父失明孝子迎醫療之百無一效竟嘔血死其臨終詩曰但願曾西養曾哲誰知顏路泣顏回聞者莫不悲之

見黃蓮一樓集

牟康民

牟生康民。當天啟初。蜀中安靜無亂形。牟生遽投牒告於巡按御史吳公曰。明年蜀有難定之者。方伯朱公。朱公者名燮元。號恆岳。山陰人也。方是時。吳公老。將挂冠歸矣。而朱公亦適以齋捧行。吳公率群僚餞之郊。既畢。乃屏人流涕。謂朱公曰。公此行。毋久稽。是間生齒。何啻百萬計。將寄命於公。且夫牟生者。年雖少。天下奇士也。他日即有事。宜與牟生謀之。朱公大駭。不解所以。姑唯唯。及奢酋之難作。朱公始大悟。急具禮幣。聘牟生。牟辭不至。復書累累數百言。大約謂朱公宜竭力守禦。毋憚百日勞苦。賊今走矣。果百有二日而圍解。先是牟生居內江山中。上官無知之者。而賊故知之。奢酋既至成都。即遣數騎往跡之。謂之曰。牟生在者。為我梓以來。至則牟行矣。他日聞牟生坐室中讀書。徹晝夜如故。又遣騎往跡之。則又行矣。賊亦以為奇。其後天子命朱公巡撫蜀。又命公總督滇黔楚蜀兵。討水西賊。牟生不肯一至軍中。然軍中

有大進止必飛書問牟生。牟生坐山中懸斷數千里外。歷歷不爽毫髮許。普名聲之將叛也。牟生豫以戒朱公曰。天將雨。穴中蟻且鬪。牟生語皆與不甚可解。而驗之輒奇。中崇禎十一年。牟生書至曰。公今年刻度不佳。當尋赤松之約。某亦塵緣將斷。不久留人世矣。亡何。朱公卒於軍。而牟生亦不知所終。見茹敦和集

曲園居士曰。明史朱燮元傳。初官陝西時。遇一老叟。載輿歸。盡得其風角占候遁甲諸術。將別。語燮元曰。幸自愛。他日西南有事。公當之矣。內江牟康民者。奇士也。兵未起時。語人曰。蜀且有變。平之者朱公乎。是牟生之事。固見史。惟所謂老叟者。又不知何人也。

和州二薛

和州二薛孝子者。天門山南陳橋洲農家者。傭也。兄名文。弟名化。禮有母老矣。兄弟相與謀曰。有母而無以為養。非人也。母老有二子。而不得具甘滑滄澹之奉。以盡天年。母所生子。非人也。顧我兩人貧甚。何所致之。計可以得錢致養者。獨傭耳。然兩人俱傭。是無子矣。母側不可不計。一人在母側。一人出傭。傭者出。一人在者。則潔治茅屋。中央坐母。絮絮語移日。以俟傭者歸。日將昏。傭者擔荷自村外來。白粳一甌。酒一

壺市脯或生肉。用楊柳貫魚輒以至。至則兄弟奔走。嚮切熟烹。酌酒奉飯。跪以進母。問母甘否。母食且頷之。則跳舞以侑食。日以為常。時或天寒朝冽。伸手皸疼。母為之不饜。兄弟左右。抑搔撫摩。更負母出曝於戶外。一人前後為侏優。斑斕。郎當作態。以博母笑。久之。母益老。篤病且死。所傭主家。怪二傭久不聞。而心念力田絕。人無過此二人者。蹤跡至其家。二人則支離骨立。不可起。見人至。哭益哀。主人不忍視。為逡巡留護。向鄰人索粥糜。冀活之。數日。兄弟竟俱死。知州何偉書表其廬。學正徐世濂為作贊。後四十四年。乾隆丙子。徐世璉來知州事。世璉。偉之妻之姪。故知孝子事。至則問二薛。後已無人。廬已無有。而偉書及世濂贊。頗在僧寺中。世璉太息曰。是則奈何。會有言偉與石參先後知是州。有恩於和。和人合祀之。曰雙清祠。今二薛孝子。何公所表也。宜可祔於是。迎取書及贊置祠中。而為二薛孝子立木主。祔祀云。見朱筠詩河集

張淑旺

張淑旺。海豐人。年九歲。父存心。商於塞外。既行。絕音耗。淑旺依母以居。旋卒。乃營葬其母。為姊弟畢嫁娶。移居宛平。冀近父得遇。知父蹤跡者也。已而聞在瀋陽。往從之。既至。無所遇。慨然曰。我不能徒返也。塞外縱苦寒。然商者。庸至彼以利。我以尋親。畏

道遠而徒返。是視親不如利。將何以子為。於是裂素縗。書為零下。標於背。遂行。兩年。歷古北口。熱河土城子。諸險。屢瀕死。不為阻。然卒無所遇。最後至錦州。禱於神。詞甚哀。有門而聽者。趨告曰。吳乃肖昌黎。張存心邪。存心僑昌黎。故齊魯間人也。自言有妻子在鄉里。足不良於行。老矣。不能歸也。子盍求之。如其言。往詢之土人。言悉驗。閭里皆來觀。曰。此張存心子也。孝子也。然而爾父前死矣。導之登北山坡。得其家。乃召其弟淑。啟同奉骨歸。與母合葬。更為制服三年。見朱筠詩河集。

吳憲

明天啟中。吳氏有名憲者。始自歙。遷於杭。為杭之始祖。憲字叔度。一字無愆。明制設科之法。士自起家。應童子試。必有籍。籍有儒官民軍醫匠之屬。分別流品。以試於郡。即不得就他郡試。而邊鎮則設旗籍。校籍。都會則設富戶籍。鹽籍。或曰商籍。山海則設竈籍。士或從其父兄。遠役數千里。或千里。歲歲歸就其郡試。不便。則令各以家所業聞。著為籍。而就試。於是郡。杭為南方一大都會。故未有商籍也。憲與同邑汪生文演。上書當事。力言杭所以當設商籍者。臺臣以聞。報可。於是憲遂得試於杭。而為商籍。諸生杭之有商籍。皆憲倡之。憲與一時知名之士。考地吳山之陽。建書院。以祀朱

子歲時朔望則咸來登拜以其暇日更立期會為文章相龔錯今所謂紫陽書院是也方熹宗朝諸郡爭為魏忠賢建生祠而杭州之祠巍然與紫陽書院相逼處其黨謀取書院地更拓而大之憲聞令長子瑗招同學諸生數百人會祠下瑗慷慨曰鸞鳳不與鴻鴉同巢麒麟不與狐狸同野今日是矣諸生皆慟哭既發憤爭門而入守者不得禦則更指忠賢像大罵罵已則共擊碎之投溷中盡撤其祠書院賴以不動閹黨以憲名聞時方起大獄因羅織之主者構憲廷訊不服即逮京師詔獄少子炎從行將以身殉父也明年忠賢伏誅事得白放歸遂不仕而獨肆力於詩書及古鼎彝碑版六代唐宋以來書畫可珍玩者既作樓以貯之又刻水晶徑寸以小篆法書樓名虛白室憲日日讀書則必手書書一卷書成必取虛白室印印卷首而藏其刻本於樓中不復讀徐徐出其所珍玩摩挲考據至秉燭而罷有子四人伯瑗仲琦叔璠季琰皆不仕年皆過九十歲未嘗析居異爨或偕行出游於兩峯三竺之間衣冠顏色典型儼然好事者或畫商山四皓圖以傳其事琦之曾孫名祿乙字鎰閣孝友君子也避雨於市古貨器者之次買水晶小印持歸家於故書卷首合之宛然虛白

室章也

見朱筠
簡河集

許四先生

先生諱某字季覺海甯袁花人行四皆曰許四先生少以俠聞既而折節讀書以聖賢自任親歿水漿不入口者七日杖而後能起自呼復含斂以及殯葬虞祔卒哭祥禫皆依古禮世俗不知喪禮有非笑之者不顧卜塋兆於某原躬自畚鍤負土成墳廬舍朝夕號哭不輟何商隱姚螫庵兩先生往弔相謂曰吾輩當盡禮慎毋倉卒為其所陋也約日至墓所使介通命先生固辭不獲始受弔號泣降自墓門東階拜其辱然後升哭拾踊者三兩先生出先生送於墓門外拜而稽顙姚何兩先生歎息曰近世以來所未見也先生身長七尺白晳鬚眉如畫吐效作洪鐘響稠人廣坐中議論鋒起即遇甚口者無不折其角而去出而交游四方公卿大夫聞先生名爭致之海昌頻遭饑饉先生致書當路議甚剴切當路避其言海昌多巨族先生籍記其姓名下注某出粟若干榜於通衢以片紙責取巨族素信先生無有難者共得粟數萬石又籍記饑民村里年貌并戶口多寡按日到城隍廟以次而給人人得所欲而去初先生與同邑查某投契最密查撥巍科躋貴仕先生杜門隱居甘貧食淡查沒賜祭歸葬葬地侵許氏祖墳兩家子弟交構先生曰吾終不以死友賣祖父也訟之

官連年不決。查許本通家。姻戚居閒者以十數。先生誓曰。頭可斷。此地不可讓。聞者乃止。後查以通海客誣先生。大吏鍛鍊周內。置先生於獄。會有知其誣者。營護得解。仇者百計。必欲殺先生。先生乃走山陰避之。數年卒。蹤跡得之。使幹役十餘人。銀鎊繫以去。先生知不得復生。義不辱。因於獄中碎磁器作屑。吞之而斃。見黃璋大俞山房集

芮處士

溧陽處士芮城。字巖尹。農家子也。幼隨父過村塾。聞羣兒讀書。纔一偏。各為覆誦如流。乃令就學。補縣弟子員。旋食餼。是時明社將亡。流寇訶海內。惟江左半壁晏然。知名士方盛。修壇坫。而城獨與同邑陳名夏。趙理之。吳穎。彭旭。史燧。馬世傑。世俊等。合社講學。以忠孝大節相切劘。稱瀨上十三子。甲申之變。聞朝臣或遁或降。而名夏官給事中。亦污偽命。則益悲吃。爰賦滄浪吟數十篇。且歌且泣。聞者擬之謝皋羽。西臺之作云。福藩稱制。捕諸從逆者。名夏逃歸里。詣城。城面壁卧。曰。君亡不死。安用子見為。名夏跽且哭曰。嘗再縊。不幸為救者誤。城厲聲曰。胡不三。亟麾令去。及我朝受命。諸人多以文章勲業奮跡自庸。而城已謝諸生服矣。名夏柄中樞。屢專使以大魁招城。出不應。隱居荒野。幅巾裹髮。終身弗變。初名夏之歸自北也。彭旭率同學攻許之。

過後修郟。將中旭以危法。既成獄。適奉敕來江南。城乃乘肩與往。而扁其外。名夏喜。遽出迎。叩何言。城隔帷語曰。從公乞彭旭耳。名夏立應諾。釋旭訖。不一見而返。城於書靡所不讀。嘗有賈挾二十一史。截僻句挑之。城應聲。指卷頁無一錯。賈不取值而去。一異僧自遠方來。博辨罕對。比推七十三甲子。溯歷元僧大歎服。乃下拜。或曰。僧故崇禎朝名進士。隱於浮屠者也。城之學博而能精。經史疑義。具載匏瓜錄。他著述半為人更名刊布。其卒也。前一日。階前紅牡丹花盡白。見彭光斗雲漢草堂文鈔。

顧童子

顧童子。吳縣人。年九歲。遭母疾且殆。藥不效。童子窘。從鄰家賃雞髮刀歸。止戶外。爇火煮湯。握刀割肱肉置鍋中。方沸。母呼湯急。遂傾盞中以進。母飲之盡。而童子袖間血漉漉出。母驚問故。以實告。鄰家聞者。爭來觀。為襄創。母病起。童子創亦合。於是吳人嘖嘖稱顧孝子。居無何。孝子以家貧。隸樂部為伶人。逐隊至安慶。按察使王君聞其割肱事。召見童子。出金八十兩贖之。名之孩良。字以九齡。館之內署。令從師讀書。迎其母而養之。居三年。王君遷布政使。以誥誤去。童子惘然無所依。遂奉母歸。巡撫楊公前在安徽時。故相識。因令入平江書院。從學於講教平先生瑤海。先生為言之。

太守李君與其同官四人醵金二百五十兩以其息膳母朝夕復屬縣令為買屋以

居

見彭紹升二
林居士集

曹起鳳

曹孝子名起鳳字士元先世徽州人父子文遷崑山賈於蜀歲寄金錢歸俄而耗絕孝子年十六矣有蜀客來問之曰噫死矣問死何地弗知也孝子大慟絕而蘇將往求其骨貧不能行長洲潘君為緡好義士也贈孝子百金將行其叔父尼之願自往挈其去久之無所獲而歸孝子既壯每念父輒憤痛欲絕潘君復贈之金四十兩遂就道陸行道河南歷陝西走成都南抵滇界西達金川書牒於背逢人輒哭訴所由無知者逾年金盡返成都乞於徽蘇人之為客者合助之得二十金禱於諸葛武侯神示所向遂東行道險踵血流匍伏失道七日無人蹤及酉陽積雪盈尺不能前路土穴中兩日有土人項生許生過之聽羣鴉繞穴而鳴即之見僵尸焉而氣微展視背牒唵曰孝子孝子掖之歸飲以湯問故止孝子宿進酒肉弗食曰誓不見父棺不食此矣其夕夢經荒原一老父與數人坐林中見孝子拍手大笑語曰月邊古蕉中鹿兩壬申可食肉覺而識之遂辭去兩人止之曰此處逼苗疆天寒地凍前行且餒

死盡度歲乃行。不得已從之一日。隨兩人出行。過荒原如夢所見。白楊下有棺纍纍。然孝子心動。淚下不止。兩人問故語之夢。兩人曰。有微人胡生者居此日久。盡往問之。從之。胡生良久曰。噫。信頗記十年前。鄉人曹氏客死。殯于是。以所遺牙牌納棺中。其殆是乎。然非白之官。莫驗也。遂引訴之。酉陽巡檢。巡檢告知州白君。飭里長察諸棺。多有主名。一棺獨無。啟棺見骨。孝子漬血驗之。沒骨。棺有牙牌。文曰。蕉鹿。孝子曰。是矣。月邊古胡也。蕉中鹿牌也。何疑乎。遂拊棺大哭。收骨行。項生許生為設祭。祭畢。以餽肉食。孝子曰。向之不食肉者。未見父棺也。今則既見矣。憶與子遇穴中。日在壬申。今六十有一日。而又值壬申。夢盡驗矣。豈非天哉。孝子起再拜謝。兩人交餽之。贖孝子遂負骨行。既歸。母見牙牌而哭曰。嗟夫。此我鎖匙牌也。爾父出門時。取鎖及牌去。不見是者二十餘年矣。復取棺以殮。而納牙牌焉。葬崑山之郊。曰朱提村。孝子收骨時。在乾隆十四年。既老尚健。飯月必再三詣冢上。灌所植樹。刈藤葛。徘徊久之。然後去。

見彭紹升二
林居士集

盧太公

太公諱存心。字敬甫。其先為范陽盧氏。隨宋南渡。五世祖臺。始遷杭州仁和之東里。

太公少穎敏。讀書數行俱下。家有書數篋。桑先生攷甫。每來就太公談。至夕。挾兩冊去讀之。太公亦夕讀兩冊。明夕又更互讀之。且相見。各舉所得相考證。如數指上紋。如道家常織悉事。相與拊掌稱快。因名其居曰三益堂。已而兩人同補諸生。皆第一。太公為文。下筆輒數千言。為詩輒累百韻。桑先生亦然。有倡必繼。繼必務出奇。以相勝。桑先生語太公曰。吾兩人生相得。死當相鄰。他日峙雙冢於湖山之畔。一題曰大清文人盧君之墓。一題曰大清詩人桑君之墓。不亦快乎。桑先生素以詩自雄。尤以文推太公。故其稱如此。已而桑先生自悔其所為。一以躬行為先務。太公嘗應博學鴻詞徵。弗就。晚日益韜晦。粥粥若無能者。子文詔。官至翰林院侍讀學士。見彭紹升二林居士集

蕭曰曠

蕭孝子。諱曰曠。江都人。其母朱氏病且殆。孝子剖脇割肝。使婦虞氏和藥進母。母愈而孝子死。孝子既喪。虞氏謂母初愈。不當使聞悲慟。乃匿語姑曰。曠商出耳。殯孝子他室。奠則麻衰。經而哭。孝子入。則常服而奉進食藥。孝養十餘年。姑死。虞氏守節以終。孝子事在康熙時。墓在梅花嶺東。邑人祠之於墓側。見姚鼐惜抱軒文集

許永科

許孝子名永科。婺源許村人。初就塾讀書。遇天地君親字。必起立莊誦。父起碩嘗役甲催科自塾歸。知父往邑當受責。夜奔赴願以身代。邑令嘉之。父獲免。或赴宴會。父母所嗜不敢食。必懷歸以進。父病。醫欲驗糞。科嘗糞。母臧氏病奄牀第。衣不解帶者閱四旬。父母沒。廬於墓。前後六年。既歸。遇生辰及伏臘。則設饌為位。拈香往墓。請父母歸饗。途遇牛馬輒引避。曰。毋或驚犯也。有榛荆剔去之。曰。毋刺衣履也。經里閉門闕。祝曰。無傾顛。迎至家。請即席上食。如平生。久之。乃餽餘。既畢。如前導復於墓。祝寢息。乃返。鄉人或愚之。或疑其矯。科行之如故。歷三十年。或以他事出。其妻代行之。一如禮。初習舉子業。親沒。不復應試。乾隆癸酉。郡守何公達善。廉知其事。大書因心篤孝四字贈之。科大驚。痛自責曰。不能揚名以顯父母。乃以父母博名耶。甲戌補博士弟子員。案發。嘖嘖人口。爭聚觀許孝子。壬辰旌表建坊。見王佩蘭松翠小菴表文集

銀查子

銀查子沈氏諱鶴齡。字海籌。德清縣之新市鎮人。慕張鷟來查入斗牛事。故又號銀查子。幼不慧。日讀書三四行。引喉呬。舌頭面甚赤。及掩卷。卒不能誦一字。好以片紙置書下。作繪事。貽同塾兒。畫人人肖。畫蟲鳥蟲鳥肖。師威以夏楚弗止也。後移家杭

州悅寫貌者陳蒼霖。遂往受業。既卒業。不敢自炫鬻。曰。奈何奪吾師衣食耶。尤善臨摹。古人仙佛神鬼士女。及龍虎鸞鶴之屬。或自出機軸。亦深得古人妙意。出藍之譽。日起。益不自安。去游嘉禾姑蘇。所至輒爭致。然不受迫促。一圖或數年不成。有欲速就者。給之去。閉深齋中。而扁其外戶。焚香淪茗。飲饌惟所欲。多陳列名畫佳硯。其摩挲贊歎者。即奉為潤筆資。然後伺閒語之。初甚艱然。既知不可出。遂留二三日。為成之而去。性好游。稅駕地必窮極佳勝。衣履喜奇古。不久即棄去。更為之。故所得緣手。盡有金陵富人某。挾萬金來新市買絲耳銀查子名。因所主者延之往。儀節頗闊略。中作設飯。又不具賓主禮。銀查子怒。推案起曰。來來。爾貌不敵一駿驢。顧欲畫工我耶。又讓所主者曰。君誤我。令筆墨數十日臭。遂袖所畫紙趨出。明日富人歎門謝禮。益恭。卒不顧。有以銀查子名聞上游。致書勸駕。銀查子曰。一富兒尚辱我。况青油幕下面孔耶。竟不往。丙辰秋。右體忽不仁。卧牀第久。性益下急。時欲引刀自刺。曰。方恨不能乘查泛天河。乃使我至此極耶。竟鬱鬱死。時丁巳六月八日也。銀查子天性放曠。口呐呐如不能語。又善忘。有詢其年者。輒瞪目不能答。及其含毫舐墨。心靈手敏。古畫過目。終身不忘。與其人殊不類。異矣。

見沈亦然五
研齋文鈔

蒼叢編卷十一

清 曲園居士纂

徐驢

徐驢。蘭溪人。七歲失父。及長。有巧思。其俗設祭。每刻楮作魚龍花鳥。置盆盎間。驢為之。工不與他人等。以是鄉里報賽。輒多得錢。市肥鮮以奉母。必損值以告。俾食而安之。已常蔬食。弗之共也。母疾。禱於神。剖左肱和藥。以進。疾良已。母歿。塋費龍山下。乃築及肩之墻。度木馬。覆以稻草。上漏下濕。非人所居。迅雷大風雨。則終夜起立。篝火燭之。蠅蚋即且之屬。纍纍也。時見雄虺。猛獸。近墓輒避去。旁近人或來與語。必諄諄勸其為善。久而化之。禾稼既熟。周數里。不設守望。歲時。有攜菜茹拜驢父母墓者。因以遺驢。驢弗受。即傾筐而去。驢嘗掘地作潭。汲水。人稱為孝子潭。云。邑令左君聞之。乃詣墓所。揖驢出。為沐浴易衣。尊以儀仗鼓吹。觀者如堵。墻。驢猶不欲去。號哭乃行。左君使從書院肄業。歲給麥八石。驢曾祖介昱。曾祖妣余氏。年二十而寡。攜其子依母家以居。為諸嫂執爨。終歲勤苦。未三十。而偃偻如老婦。兒年十三。復攜之以歸。歲大穰。哭曰。天平。與兒俱死矣。夜夢神語之曰。有雞可賣。何泣為。詰朝視時祭。無雞也。

見藉床草在門後。試屈折之。宛然鷄也。悟曰。此豈可賣耶。復翦紙為冠距。傳之翼。命兒攜以適市。人競取之。一雞得三錢。母子藉以俱飽。蘭溪院長姜炳璋作母有雞詩曰。阿母饑。饑兒啼。兒母啼。母有雞。有雞無饑。神告之。母青年。貌若媪。索雞不見雞。乃見藉床草。屈草作雞形。翦紙翎與爪。一雞三青蚨。百雞一束藁。雞乎雞乎。饑母飽。母有曾孫。其名曰驕。三年藉草。二親墓旁。白日暗黃墟。雞聲號晚霜。一門節與孝。千秋揚其芳。

見莊
妍集

邵如椿

邵君諱如椿。字莊園。浙江紹興人。考南之。挾申韓之術。游陝西最久。君遂占籍咸寧。補弟子員。能世其父業。攜孳就通渭。知縣之聘。乾隆四十九年五月。甘肅逆回田五。由鹽城南竄。距縣城信宿而近。謀者以告。知縣將逃。君曰。子宰一邑。而使城中生聚。皆陷於賊。其可乎。且逃則死於法。守則死於賊。與死於法。寧死於賊耳。縣令許諾。然惟怯不任事。君乃立於門閭。袒而大呼曰。好男子當從我守城殺賊。俄頃。應者數千人。乃令壯者執刀矛。老弱運甕石。並集城上。而身率猶子曾燮。登西墉以當賊衝。十一日。賊至城下。城垣庫薄。又倉卒不能具火器。賊蟻附而上。君手短刀。格鬪良久。不

支被執見賊方屠戮乃曰首議守城者是我也何多殺他人為賊遂斫額批耳斷頤洞腰腹剗左右臂凡十三創而曾變奮力捍衛亦被十一創借君罵不絕口以死知縣匿旁舍得免事定逮入都以失陷城池論如律

見莊
所集

吳漫公

漫公情諧而性狷者也少時讀書不成然通六書之義事之所指形之所象與夫形聲會意之趣轉注假借同異之說有號為文人者所不能知而漫公一一知之由小篆而上溯之至於大篆古文鐘鼎款識之別於時代者靡不徧觀而盡識焉既知之又學而能書之故他人之書由真行而通於隸篆漫公書則濫觴於篆籀已乃順而擴之於是行楷八分皆有法度可觀然家貧必自食其力乃曰雕蟲篆刻豈壯夫果不為耶遂肆力於繆篆工摹刻售其技而因以名於時江寧沈君凡民權徽州府同知事以篆刻知名者久有天下圖書第一之目見漫公所作嘆曰藝蓋至此漫公喜將往謁之一日沈君至府漫公望見之華顛白鬚面斑斑如凍黎乃艱然而哈曰吾觀若長我且三四十年我如其年藝或當過之遂不復往見其自矜而善謔也如此人無識與不識欲求書分篆刻者苟見其面攀延之未嘗辭至或數日不歸思歸矣

或援而止之。則遂止焉。巨室富家知其如此。以為易致之也。冀其一來要之。且至於再三。往往終年不見其至。其家有吉祥喜事。賀客滿堂。坐中必無漫公。初漫公為汪氏學生子。一母既不能乳兩子。而家貧又不能致乳者。會吳氏佩蘭翁亦貧家也。無子。遂抱歸乳之。而翁旋卒。母氏青年守節。撫之育之。俾至於成人。母卒。格於旌例。漫公乃請於郡守徐公。縣令張公。並給匾額以褒之。合於名律。養子從姓之條。遂成室於吳。娶王氏。而漫公所自出之母年老矣。思念之。因言於吳。為娶曹氏。已而漫公所同產之兄死。有一子亦相繼而亡。於是漫公寢疾。自念不能起。乃親書遺言。付二子士懋。士慎。而命士懋承汪氏祀。蓋士懋曹氏所生子也。此所謂亡於禮者之禮。其亦禮之善物矣。夫漫公名兆傑。字雋千。號曰漫公云。見程瑤田集

張若筠

張君諱若筠。字竹鄰。丹徒人。好學。於書無所不窺。聞有異書。輒重價購之。或手邊賸校勘。砵砵不少休。同縣蔣舍人宗海藏書三萬餘卷。多善本。君所藏踰二萬卷。而法書名畫。吉金貞石之文。別為卷軸。不在此限。京口士大夫收藏之富。推此兩家。君性簡重。寡言笑。不妄交人。晚年益屏人事。掃一室。日坐卧其中。子弟僮僕。非呼召不至。

前沈潛玩索神凝氣寂過之者以為無人也與兄坤弟堂相友愛家有園亭竹木之勝兄弟並能詩善飲精鑒賞暇日具壺觴召朋舊流連倡和互出所藏元明人書畫品題甲乙以為樂坤子奎堂子鉉及君之子銓亦能詩奎兼工畫揚州某氏藏書為江淮間第一其子孫不能守君聞即冒風雪渡江購得宋鑿書數部以歸奎為作風雪載書圖一時名士皆為之題詠京口多佳山水君興至即出游愛八公洞林壑幽邃讀書深雲精舍者數年大江南北名勝之區屐齒殆徧而杭之西湖凡七至君少以諸生高第食廩餼循例貢太學遂不就試其居鄉睦婣任恤樂振人之乏絕嘗以田百畝為書院諸生膏火資邑有留養局以養鰥寡孤獨貧病之人君以田四百畝佐其費鄉人德之嘉慶三年卒年六十四

見劉台拱集

董十先生

先生名懷書字邃學世居宜興縣西南山中胥井村號胥井董氏父啟峯公舉五丈夫子先生其季行十學者稱董十先生生有異稟跖地不羈五六歲時鄰家釀酒仰卧其下以口盛之大醉淋漓濡首顧閱讀書聲則喜竊聽一二過即背誦如流水九歲就鄉塾頡悟絕人年十一瀏覽左國漢史諸書輒捉筆為文勃勃有奇氣尋丁父

喪以貧故廢學業農兼服賈伯凡某以百金命之潤州貿易數月傾其資而歸凡大怒先生雅不屑意也然緣此益窘乃更折節砥行發篋陳書晨耕夕讀或采樵山中高歌秦漢人文字尤嗜韓昌黎吟誦不少輟里中課藝常荷鋤任援筆立就每冠其曹名震一邑工文士爭先結納於是輟耕樵業教授生徒而所得脩脯輒以沽酒垂手立盡貧益甚酒興日益豪每醉則哭或放聲長號儕輩骨怪之以為狂平川蔣公以詩古文辭伏一世猶心折先生謂其子楚誦曰此振古豪傑士也年垂三十尚困童子試一日自塾中歸聞縣試期迫即夕秉燧夜行試畢復夜馳歸往返二百里深山峻嶺高吟長嘯聲震林谷竟冠一軍即於是年籍於校先生長身鶴立慷慨負大節以古人自期家徒壁立而揮財如糞土意氣浩然公正事輒發憤遇豪強黜桀不少懾避而山案升科一事有德於民滋鉅其他義激公憤挺身犯大難者數矣卒得無恙亦屬有天幸云生平尤篤友誼應試澄江白下輒沽酒置精饌招同志諸人痛飲雖金盡典衣不顧也嘗曰考試甚苦余獨甘之非為沽名樂與素心人共晨夕耳先生歿後頗著靈異聰明正直死而為神理或然歟墓在寒墅祖塋側過之者雖樵夫牧豎必肅拜殆類江都相之下馬陵云

郭六

郭六者。江陰市人也。其鄰吳某。以乙科將令青神而艱於裝。吳之僕有給六者曰。若居積於市。拮据所得。日百錢耳。曷以所有奉我公。隨官人高車駟馬。且償而息十倍。六是之。乃罄其貲。得百金以獻。而隨入蜀。既至青神。六無一長。居署中。執爨而已。久之。吳公亦已忘郭六之所以入蜀也。而役使之。其公之子若猶子。下至臧獲胥役。使之。而六亦不自言。日執爨事。惟謹。久之。吳以侵冒軍儲落職。於是諸子諸猶子。下至臧獲。各席據其貲。或不告。或詭告以故。皆去。比吳入獄。挾樸被從者。郭六一人耳。吳公性仁而闇。諸子用事欺之。以至於敗。既敗。諸子爭擁厚貲歸。而吳公特貧甚。六忍饑寒。事之彌謹。時獄中謫官凡數人。常詩酒過從。六竊私念。我公數飲食諸君。而諸君閒至。醴酒不設。非報稱禮。乃私以百錢市酒脯。伺公與客談且久而敬進之。客既去。公問。以情告。則怒而詈之。六直受。不敢出一聲。詰旦竟去。去久之。突以僧服至青神。復謁公。泣拜階下。公且喜且泣。下曰。若胡以僧為。余所虧項。賴僚友相周。十有六七。俟諸子鸞塵至。可千金。幸而集。猶有首邱想。而胡以僧為。袖出一金。若持去。伺逆旅中。朝夕當入見我。六頓首謝。去之旅次。忽病。略不省人事。沈沈如醉。凡十日。而吳

卒以限滿不償論斬之日。逆旅主人彊扶六起。椎其胸。號而告之。六瞋目直視。忽疾趨出。至市中。伏公屍而哭。極哀。一市人骨出涕。既殮。塋城外隙地。凡知公者咸來唁。六衰麻被體。執杖匍匐。稽顙答拜。慟如孝子云。儲玉閨者。故嘗之青神。交吳公。雅知六。因勸之歸。且曰。爾有父母。曾聘妻未娶。豈得僧終異鄉者。余不久南還。盍隨我返。六不應。既而候玉閨於寓。泣而告曰。六不歸矣。黃連二舫。幸致六父母。為贍老費。囑六妻速嫁。六不歸矣。則再拜號慟而去。異哉。郭六之為人。也。無故棄其垂白之親。已聘未娶之妻室。捐百餘金。隨人於七千里外。而為之賤役。為之子。甚而為僧。其無乃非人情。然以其人親所生之子。若姪。暨用事童僕。籍其財。掉臂去不顧。而一鄰人之子。又愚其破家自隨。而訖患難。生死以之。則又何也。不亦異乎。

見備所錄
偏園文集

張瑛

張瑛字玉采。汾陽縣人。家素饒。每於歲杪。出粟若干。周鄉鄰中之貧者。以為常。康熙三十六年饑。瑛既出財粟助賑。而賑所不及者。持田契求售。踵接於門。皆自貶損價值。瑛第如其願。售之價視平時。蓋不及十之二。於是得田且千畝。明年大熟。瑛徧榜各村曰。願贖者聽。匝旬盡贖去。其行事大致類此。瑛所居曰西官村。先是順治六年。

姜瓖之亂。東官村趙姓者。眾乘亂劫其家。男婦俱被殺。獨一禡子奔至瑛所。瑛納之。眾來索。瑛曰：「是不可得。必欲得者，吾兩村且鬪，視強弱。」及亂平，瑛助趙氏禡子白諸官。治罪者十餘人。當盜賊之蠱起也。瑛之村人將逃避賊。瑛曰：「賊至，知而先離，散能保，即獲全乎。孰若為守計。」眾以村故無堡寨，未可難之。瑛曰：「堡寨誠不可猝為。環村而溝焉，其可。」遂相率為溝。廣一丈有奇，深約倍於廣。東西設吊橋各一。又以其家樓堡封貯村人財物其中。既而賊大至，踰溝，村之人退入瑛。見一賊方據椅坐，左右指麾，急趨有力者，舉石礮投擊。中之，身首俱碎。立斃。乃其渠魁也。餘賊怒，攻之急。樓上瓦石亂下，不得近。乃取薪積於門，欲火其樓。宅舊有井，僅供汲用。至是，泉忽大湧。男婦遞傳水於樓，以撲火。賊計不得施，又失其魁，數日稍稍去。瑛曰：「可以出而逐之矣。」相與持械出，大呼擊鬪。賊奔潰。方是時，瑛年纔十有九，遠近村被賊殘破不一處。而瑛之村獨完聚如平常。人服其智勇。瑛九十有一歲，視聽不衰，不脫齒，行不杖。一日無疾卒。見戴震戴氏遺書

王敏

王敏，汾陽縣武生也。廉潔自持，值歲饑，斷餐。二日得一飯，弟手白金至，曰：「少易粟。」敏

正色語第。奈何干人敗家風。令持去。嘗有督理事。司出入。事竣。衆指餘金曰。準材計費。不宜餘。殆君之物。雜入於內耳。敏曰。諸君謂我貧。意以餘金畀我。公事不可實私橐。友以其困。欲有贈。袖百金至。坐語竟日而返。難出之袖中也。遠近咸呼王廉士。然生平勇於為人。衆以公事宜謁有司。二日不得達。敏至。徑入陳。衆方疑畏。而敏詞氣慨然。有司無以屈之。卒如其請。一友人觸官長。在縲紲。親戚畏避。而敏往來省視。官長訪知其名。不加怒也。敏老而無子。一婢自幼畜之。長有姿容。或勸納以為妾。敏曰。吾貧困。何又重累少年。尋有不惜三百金來購此婢者。或以勸。答曰。貧。吾分也。恥因婢取財。况不得其所。彼之生死事大。吾雖終窮。弗忍為。於是即為擇配。嫁之。敏嘗徒步赴省試。旅舍中。遇一稚子。察知為被誘者。走百里送歸其家。則寡婦撫此兒。忽失之。正遑急。不欲生。望見兒。母子如獲更生。願酬謝。敏曰。吾憐稚子無依耳。何謝為。遂行。敏狷潔多近義。是以人嘖嘖喜稱道。年七十有一卒。送葬者塞於途。

見戴震戴氏遺書

董丙齋

董君諱達存。字華星。號丙齋。先世自教授。公博古官於毘陵。因家焉。君七歲。就外塾。矢口成文。家故貧。且體羸多病。而刻苦自厲。不間寒暑。中乾隆庚午科舉人。登壬申

科進士。授國子監學正。以太孺人齒高。遂請終養歸里。太孺人壽九十六而卒。君哀慕如嬰兒焉。家傳青囊書。少即有神解。後出游。復獲異人授。凡形家日者星角壬遁諸術。無不洞達其奧。然頗自秘。惟以相宅墓請者。率應之。所至為人審決。衰旺更易。向背克期。輒有神驗。以此名曰隆。東南自大府以下。每營廨宇。必得君一臨相度。為幸。所聘遺亦不貲。而君受之灑然。行囊及家。未嘗自潤。購吉壤為先人改墓。建宗祠。置田百畝。以供歲時祭饗。所居數椽。僅蔽風雨。冬夏衣故表葛。塵垢色黧。弗厭也。會郡東郊欲建普濟堂。贍老疾之無依者。久未經始。君慨然獨捐千金倡之。乃得集事。君藹易近人。而遇所不可。夷然弗屑。嘗有淮陰鮪賈。具重幣延君。中道忽不就。單車徑走二千里外。為故人卜兆域。以踐宿諾。飄然而返。其孤介如此。見錢維喬竹初文鈔

洋和尚

洋和尚。南豐瑤華村人。姓曹氏。名不傳。人以其兩目顛綠睛。頂髮禿。但呼洋和尚云。年十五。為邊將所掠。負軍裝出入塞上。壯遂趨勇雄。其曹能馳驟馬。挽強弓。左右射。聞吳三桂叛。南方騷然。潛脫身歸里。聚子弟之壯健者。陰部勒之。尤有智能。料時變。知取精忠必叛。叛必遣賊由汀州。窺南豐。趨江西。謀築砦保鄉民。先挫賊銳。得三百

餘人椎牛軍山神廟。漉酒敬血。慷慨論大義。綠睛光閃閃。衆感泣怒憤。願效死力。仰見神面微醺。衆喜曰。神助我。神助我。軍山者。南豐邑之鎮山也。高聳天表。村距山近。多詭嶂奇石。上有天生城槽可若。其最險者。曰虎頭岩。多石屋。可容千餘人。南僅梯一綫如穴。縫之上。塞一石。可限萬夫足。若兩翼。可出守望。洋和尚笑曰。天險賜我。賊不足禦也。乃聚糗糧。厲器械。備井竈。陂瀑泉流。指畫戰守計。徙闔村民居其上。寄語城中人。爾第固守。吾必盡剉之。若下。已而賊前鋒果至。先是。洋和尚勇聞江閩間。賊計啗以官。作鄉導。及至。仰望若形狴惡。斗絕如虎牙。下闌四壁。皆欲搜人。猿猴無敢踰。旗幟鉦鼓殊森嚴。賊既膽驚。雲梯呂公車不可試。若中飛石標弩如雨下。擊殺賊數百人。賊怒。毀村屋材。薪其下。思燔若。而石壁皆含泉脉。天生滋潤。水恒淋漓。滴火不能熟。賊計窮。請其渠曰。若險而固。破不易。盍棄之而趨建昌。渠曰。不可。建昌有官兵在。吾戰則洋和尚必躡吾後。背腹受敵。危矣。以一月糧攻之。必殘。然後西出耳。遂掘塹守之。乘間出他村焚掠。洋和尚佯與衆賊歌飲。俟賊少怠。率死士二百餘。從他險縋而下。直斫賊營。若上婦女。各擊銅器。助鉦鼓聲。撼天地。石泉風樹皆震嘯。若萬騎下。賊駭懼。不知所為。自踐踏。斃之過半。洋和尚斬其渠頭。大呼鼠輩。敢辱吾刃。令

汝取逆戴其頭來既歸若謂其眾曰小勝勿驕賊必悉精銳來吾糧僅足支一月耳
密遣健足齋血詞間道赴省城告急十餘日偽帥李以大軍繼洋和尚預設伏磨刀
渡左崖穴俟賊半渡標弩突發射殺前隊數將賊駭多墮盱江死氣為奪指若切齒
罵曰吾不血此若醢洋和尚肉喂犬誓不生遂掘長塹築高壘待若糧盡乃屠之洋
和尚每出奇計射賊相持三十餘日賊不能動纖毫而江西大營援兵至偽帥迎戰
南豐東郊官兵陣稍却洋和尚盡其眾下若奮力夾斫之賊大敗遁歸汀州南豐以
全帥召洋和尚至給牛酒慰勞曰使江西半壁不動者汝功也將奏之朝予以官洋
和尚叩首固辭帥曰義士義士即百年後汝鄉人當祀之社厚予白金彩繒洋和尚
盡散之鄉人葺破廬安生業矣乃日與其徒短衣草履漁釣射獵為樂春秋佳日擊
鮮提甕登舊若狂呼酣飲逍遙四十餘年歿壽八十鄉人憶帥言塑其像鑿而鎡祀
諸社歲旱以簫鼓彩幟舁行墟市中呼曰洋和尚來天果雨洋和尚終身
無妻子老猶自製竹扇易錢沽酒醉作擘窠草書甚怪也

見張九鉞
陶園文集

温樵水

樵水姓温名廷鈞字右衡樵水其別號也祖籍浙之長興高祖美如遭仁和樵水生

及醉。因厭其啼。置其祖膝上。季父世珍。讀書其側。啼遽止。遽領頰。為讀書狀。已乃咿
唔成聲。日為常。五歲。其季父語以讀書樂。則欣然。偕白其祖。就隣塾記誦之。提常兼
他童子。年十五。入邑庠。二十赴省試。貢於成均。其學業始嗜詞賦。熟精於文選。所作
义手立就。奇字爛如。觀者菑目。才名播一時。久之。乃謂所業弗善。取六經三史。熟之。
條其疑義。作古今體詩文。率行以唐宋大家法。雖應試不易也。雖躓不悔也。嘗語其
游曰。讀書不第。自不折閱。不汲汲於經史。而以鬼困册子老子。同里陳翁寅。以窮經
論史為業。名流就攷問者。日無虛年。倍樵水矣。而相得如等夷。每著經說。必俟其過。
從。商校竟日。每詠史。必索和焉。樵水性貞介。氣清可畏。人以是多望之。見其來。稍稍
引去。然語崖岸。嶄然之行。則莫不推樵水第一。語能詩之才。之浮於名者。則莫不推
樵水第一。年二十八。病心血耗卒。卒前三日。猶寓書陳翁。論韓詩商頌說。翁議刊其
遺稿。屬其季父蒐輯於其家。苦散佚。不多有。見蔣師燭
穀良堂集。

王次瑤

當世多治鄭氏易。網羅放失。是正文字。彰矣。德清王君南湖。攷證之作。句櫛字比。疏
通證明。使北海微言。復聞於既絕之後。厥功偉焉。君諱琨。字次瑤。南湖其號也。晚又

號退思。乾隆甲午科舉人。丁未會試。大挑一等。分發直隸。補成安縣知縣。少嗜易。著
易集解。備究眾說。又能研窮形聲訓詁。作集韻正。以糾曹氏刊本之失。作說文編韻
讀各從義。以補徐氏朱氏之音。作爾雅足義刊誤。以匡邵氏之違。既而覃思畢精於
鄭君注易之意。心知其故。攷經以釋文為主。不言鄭本者。舉所標他本參訂之。攷注
則汎宋羣籍。擇善而從。旁及異義。以附鄭說。因推所存。知其所佚。引伸觸類。以達厥
指。官成安時。以風俗教化為己任。聽事之暇。召邑諸生。以講經說義。吏胥子弟能文
者。咸進與焉。有師氏兄弟。爭田相毆傷。置之一室。使不傷者。養傷者。而身譬喻之。兄
悔悟泣拜。讓田為公產。上官以為賢。將換授繁劇。意不樂。引疾去。讀書終身。君世居
德清。千秋鄉之闔山。六世祖權。移居於南莊。祖繼聖。父元鼎。兩世居杭州。君仕而歸。
卜居秀水之秋涇橋。塋於錢塘長壽鄉白沙山仙家隴。見王宗炎晚
聞居士集。

跣足傭

跣足傭者。楚人也。陳其姓才高其名。少孤。鮮兄弟。窮不得活。去之寧州東南長茅里。
終歲傭人。以脫於饑寒。跣足役作。雖巖巖荆棘中。履踏如坦途。無所苦。人以是羣呼
跣足傭者。傭狀甚癯。蓬頭垢面。膚如漆。擁敝衫。補綴針紉。纍纍若蟻。虱然。嚴冬無床

襦。獲稻草藉地而寢。嘗暑月從客宿館舍。客張帷。夜半苦蟲。不得寐。起燭之。則傭方倚牆壁。躬黥。雙眸炯炯。恣蟲嚙。嗚唱曰。噬。客叱曰。欲子何不揮之去。傭笑頷之。睡如故。生平不葷。不飲酒。不畜妻子。其傭於人也。日取十錢。多與之。不受。暇則閉戶。跣履。三四日不食。亦不饑也。掘土納積。月檢視。遇廢疾餓寒者。出授之。往歲傭冒暑踰毛竹山。喝甚。求飲不得。幾死。適刈蔗者潤之。斷節揉汁以甦。傭歸。盡發所藏。即其地構亭。日煮茗飲行者。又廣其惠於他地焉。一日傭被髮持長鏡。雜衆中。艾人曰。衆再休。獨傭俯首病瘦。劊鋤不輟。衆固止之。固勿聽。衆怫然。既相與斥之曰。吾傭與子俱傭也。傭無常主。吾傭食倍子。取又倍子。而人卒不聞異視子。然則子何太自苦為。傭曰。然。子輩所求乎人者。誠是。雖然。吾性拙。又衰。得飽一日腹。即窮一日力。猶懼怠事。獲天殃。敢含業嬉乎。今子輩不已之求。而使吾效尤可乎。言訖。愈執業不輟。見萬承風集。不辱齋。

文集

李松亭

李君諱鑛。字異凡。號松亭。其先范氏。自宋世居登封。為著姓。迨明中葉。有諱尚者。遷魯山。遂別族為李氏。君姿貌沈毅。目炯然射左右。望之。屹不可犯。然性獨樂易。好與

人酬接。庭前時老梅數株。多叢竹。菊雜花卉。身自灌漑。有老松。僂偃如龍。蒼鬣壓屋脊。君顧之而嘻。輒盤桓其下。號所謂松亭。由此也。暇則摹繪事。酒酣引筆。落落自喜。或劇飲。懽甚。與好事者。校拳勇。大相娛樂。以故人多愛從君遊。有梁燾者。依門下未幾。以他事被繫。君身在任。而釐潛逸去。踪跡莫可得。幾為當事者所中傷。君益不置意。而好客如故。他日。君獨游縣之東山。遭羣惡少。脇掖一少年。少年左右顧。顛躓不肯行。詢之。則羣惡少出穢言。欲行強污者。君大怒。徒手搏數人。盡仆。奪少年以歸。遣僕護送之。固近村田家子也。君負氣而尚義烈。其遇事奮發。類如此。見武億授經堂集。

李仲謀

李君坊。字仲言。後易字仲謀。籍祥符。入開封府學。為廩膳生。方十五六歲時。伉俠慕交游。然性尤簡易。奴視其儕伍。居嘗佯佯不適。欲得友有風烈者。或以某告。君趨見而返。恚曰。向殊妄聞。此曹徒一行尸耳。乃勞某過從耶。他日。君在京邸。鄉人官廣平者。慕君。邀君主某幕。不合意。棄去。聞從李西村官所。前後幾五年。自西村初署縣事。及得補實。君恒不避嫌怨。為之左右。其僮奴僕御胥吏。外內聽役。日有常約。違輒痛繩之。或有驕頑。君手扑其人。一署飲嗜。莫不屏幙。後西村以憂去。君於交代委籍。悉

強力綜練。條分簽疏。事覈其實。以故與後事者忤。至詬厲不少顧。俾西村幸無累。然後自謀歸。策蹇走三千餘里。轉貸以抵里門。至是亦倦於游矣。初君在京師。謝弔者當過一顯人。自具小東書名投其門。竟去。人多以是非君。君曰。吾粗野習。安識所謂士大夫禮。且如公等指。即謹易手本。亦與今外司道府謁尚書同儀。獨非僭耶。禮不下庶人。吾諸生。何殊於庶人。幸勿復言。聞者羣服其辨。而不知君固負氣。以詭詞辭也。見武德投經堂集。

彭梅谷

彭梅谷。名遐齡。明末奇士也。家河南魯山。生十月。能言。十歲通毛詩禮記春秋比長。益博綜羣書。下筆千言立就。兼嫻武畧。能騎生馬。駒上坂。馳左右射。發無不中。自謂辛稼軒。陳同父。一流人。崇禎丙子。年十九。應省試。以五經格於例。置副車。改就武闈。試哀然為解首。撫按以文武才薦。而廟堂循資格。寢不報。己卯。再以五經試。仍置副車。自是遂罷舉。益務為任俠行。總兵陳永福招之。遂暫留參永福軍。潼關兵敗。永福降賊。梅谷陷其軍中。先是賊相牛金星。本實豐舉人。授經旁縣。館梅谷家。梅谷幼師事之。及金星從賊。往來河南。嘗蹤跡梅谷。梅谷深自諱匿。至是聞在永福軍。大喜。趣

召之曰。若我弟子也。來則立富貴。不來且死。梅谷大言曰。若已為賊。即死。豈從賊邪。金星命收之。而梅谷已竊騎逃。一日夜馳五百里。越太行。乃得脫。閉行至江南。度時事無可為。謀歸夏邑。中途遇盜劫。不得已。由故人薦入直內院。數月。出主江浦簿。忤上官。拂衣歸。順治八年卒。於百尺河之野。年三十四。先卒時。自撰年譜。謂生平流離奔走。無日不在憂患中。遺詩一帙。亦多感時念亂。識者讀而悲之。見咸學標 鶴泉文鈔

董靜芳

董靜芳。祝魯齋婿也。為人孝友。勇於義。自以幼失怙恃。既贅於祝。傾貲為外氏養生送死。最後有信陽負骨事。初魯齋祖廸前公。由副貢令清苑。有五子十孫。登進士舉茂才者八。先後殂謝盡。君皆塋之。獨魯齋之伯中調公。病卒莊浪官舍。叔愚亭公。客死信陽。骸骨久未歸。魯齋老貧無子。言輒涕泣。告其女。以為大憾。君聞而心識之。會游秦。徧訪。得中調公後人以告。魯齋喜曰。吾祖其不餒矣。顧叔向為異鄉之鬼。可若何。魯齋沒後十數年。君有武昌之役。遂取道德安府。貽書應山令莫公子捷。告以收骨事。給文沿途查訪。由應山至信陽州百餘里耳。州城北有瑚璉書院者。乾隆丙子丁丑年。愚亭公嘗掌教於此院。側伴書處老僧。猶能言之。而未詳死狀。時知州事者

諸公以課鄉人也。投以文。翌日遣役來得公之去妾春梅。嫁後復寡。言公有殤女。曾許字醫官吳棟之子。又紹興徐書紳者。久負公之銀。乃共謀藁葬於城北三十里許。梁家墳。時徐已故。吳年八十餘。偕之出城。荒塚纍纍中。見羣鴉噪一大樹。跡之得土中仆碑。鐫曰。浙杭海寧縣歲貢生祝諱溥字愚亭公之墓。吳曰。此徐所立也。三十餘年矣。請於官收骨貯橐中。歸瘞之祖塋。告祝氏家廟。此癸丑冬事。先是君之伯慕梁公歿。其長嗣曰可大無子。而久客於楚。君喟然曰。大宗何可絕。乃乞其弟虎文子善餘。攜之武昌。後之。蓋其往也。為董氏綿宗祀。其歸也。為祝氏殮旅魂。數月之間。兩舉孝義事。厥功偉矣。見周廣業蓮處詩文集。

趙雨亭

趙雨亭名璣。安徽桐城人。少讀書。性倜儻不羈。輕財重然諾。有古俠士風。丁未歲。過表甥大名尹葉君。賜署。甫踰月。賜緣事戍伊犁。戚友蒼黃星散。奴僕脫身去。賜父母老且病。痛子子身投荒。日夜憂泣。雨亭毅然曰。與人共安樂而不與共患難者。非義也。玉門關果不能生度耶。余雖老。尚堪一行。遂偕往。躍馬鳴鞘。略無難色。至伊犁。將軍愛賜。才置幕中。甚得所。雨亭始告歸。曰。汝居此安。余且歸。復汝父母。當再來。終不

使汝寂寂萬里外也。歸一載。暘母卒。雨亭慮暘聞訃哀毀。復往慰之。至關外。聞暘隨將軍移駐塔爾巴哈台。改轍而北。將軍聞雨亭至。降階執手曰。義士果來矣。敬禮愈重。由是雨亭之名大著關外。將歸。將軍厚贈之。俾同貢馬者行。重其義也。先有葉椿者。暘族孫。河州牧中之子也。以監糧事久戍伊犁。雨亭再出關。椿母以金託寄。伊犁在烏魯木齊西。塔爾巴哈台在烏魯木齊北。相距遠甚。音問阻絕。雨亭歸。路出呼圖壁。遇巡檢陳君棧。陳亦皖人。因迹椿。始知椿死伊犁久。雨亭曰。椿家無三尺童。白頭老母。日望其子歸。今椿死遠域。旅魂飄泊。情何忍。且余既挾若貲來。當攜若柩歸。因與陳君貸貲助費。迂道八千里。載其柩以歸於桐。見李符清海門文鈔。

羹湖先生

先生姓王氏。名繼統。羹湖其別號也。生有異稟。神寒而貌癯。幼從塾師講肄經學。稍長。即旁通諸史百家。以名諸生。丁明之季。乃絕意仕進。退而放浪於荒墟絕嶼之間。扁舟草服。自樂也。未幾明亡。乃益頽然自廢。不求聞知於人世。世亦無有知之者。一日停舟江上。擊楫作歌以自娛。其聲鏗然。若擊金石。鄰舟皆起坐驚視。是時海宇初定。值英王巡行江上。亦於舟中聞之。心奇其人。欲致不得。因以請而後就見。懽然談

笑如生平交。偶及世故。且喜其才。因給劄。命出為丞佐。對曰。臣故村野鄙人。但得具難黍課漁稼。以終其天年足矣。安能有豪毛之利益於國家耶。其奚堪此。郡佐為長揖。不受而歸。日鍵其戶。足不履城市者且二十年。著有羹湖文集若干卷。見王灼集

滕家瓚

滕家瓚者。麻陽縣人也。居高村。與苗壤接。乾隆六十年。苗民石三保等叛。大掠麻陽。家瓚悉出家財數十萬。招集鄉里丁壯數千。以禦苗。殺賊無算。苗深讐之。一日。家瓚率眾守溪口。苗賊驟圍高村。曰。出家瓚乃已。於是家瓚之族弟家泰挺身出而語其村人。豈可惜吾一身。而延害一村。遂大罵賊。我即瓚也。賊剝家泰皮。家泰罵不絕口。至死不更一辭。又執其家口。始知其非家瓚也。瓚聞而馳歸救之。已無及矣。家瓚屢以殺賊有功。大吏具聞。上命賞以八品職官。一日戰歸。福督部親見勞之。家瓚曰。瓚既受國恩。敢顧家歟。且家已破矣。苗讐也。有殺賊報國而已。復慷慨往溪口。與數百人共守之。賊大至。急攻之。家瓚力鬪。絕援。其從者曰。賊指名索夫子。殆難免矣。盍易服而行。以求援也。易服而死。賊去。官軍至。求家瓚所在。以易服故。賊不識其屍。遂收其屍。塋焉。家瓚仗義輕財。好施與。又善撫眾。有信行。遠近之人。一時皆慕家瓚名。不

舉其姓但稱瓚也瓚有力嘗負一鐵礮擊賊輒殪云

見徐錄慶玉山閣集

張星象

張星象字介萬古田縣學生生有異稟嘗作書數千言抵龔進士景瀚願受業為弟子龔奇其文言於督學朱文正公歲科兩試拔冠其曹試事既竣公選九郡諸生之尤者福州十人外郡二十四人肄業鼇峯書院親課之寧化張騰蛟孟詞最為公所賞識介萬異軍特起乃拔戟自成一隊閩中因有二張之目時閩藩雨松徐公與文正公同號知人能得士嘗謂朱門之有介萬如韓門之有劉又也癸卯鄉試將揭曉文正公置酒招致門下士孟詞輩皆在坐介萬葛衫躡高屐最後至公目笑之曰昌黎詩有云冥觀洞古今象外逐幽好可為孟詞詠又有云雜作乘閒睥交驚舌牙醜非介萬其誰既而孟詞領解在坐者多獲雋而介萬報罷介萬文詰屈生澁不可句讀一題入手狂搜險覓得未曾有非文正公莫之奇介萬亦淚簌簌然落謂從此長已矣新督學至公薦士十人介萬與焉且恐其文不得當以為是實神駿當相賞於牝牡驪黃之外新督學甚其言書院初課故抑之且面加誚讓介萬弗能堪自念居深山讀史漢談荀揚十數年不遇一遇矣又不能及時自奮道師方行而齟齬之者

踵至。懼一旦遭黜辱。為當代大賢羞。時方寓龔家。早飯罷赴書院課。而是日實未作文。嘿嘿不樂者終日。次早獨行。出西門。至虹山橋。徘徊橋上。再四。遂自投於水。以死。年止三十有一。龔使人尋之。書院不得。啟其臥室。於案上見其訣父書。及與己訣書。拍案驚叫曰。介萬死矣。三日。得其屍於白沙鋪。端坐沙中。面如生。其下有清泉一泓。先是介萬喜扶乩。有白泉沙者附焉。辨論相往復。文思益奇。至是而具識。乃驗。龔既買棺以殮。呈其書於徐公。且述其死狀。公喟然署其紙尾曰。嗚呼。生真死矣。自石君去後。余不能早為扶植。致生益孤憤。余不能辭責矣。介萬卒之十年。孟詞始登癸丑會榜。為忌者中傷。乙卯赴補殿試。卒於京邸。竟不得成進士。與介萬皆酷貧。無子。詩文皆散佚。見朱東鑑如古堂文集。

蒼叢編卷十二

清 曲園居士纂

壽先生

乾隆五十一年。林爽文反臺灣。不旬日。有衆數萬。於是隴彰化陷鳳山。所嚮如破竹。獨淡水城不下。淡水圍竹木為城。無土石。自其年十二月至明年五月。攻最久而城獨完。民不為賊。文武官莫在。惟諸暨人壽先生為之守。先生姓壽。名星。字同春。以字行。而壽先生之稱為著。以習文法。佐人治吏事。至臺灣。當是時。淡水同知潘凱前沒於生番。代者程浚。方按捕大甲。城中空無人。爽文以其衆入。程浚子倉卒攜印走。而浚別戰死。先生與其輩數十人。俱縛坐堂。皇下。賊故聞壽先生能識官事。顧不知孰為先生。一一誰何之。已乃從先生求計畫。先生曰。而屬以烏合之衆。頓兵荒城中。何以食。官軍至。聚而殲旃靡及矣。凡兵分則見強。合則示弱。而奚若。賊故搜城中無積儲。則皆曰。然。因脫先生械。留其黨守城。而自出四掠。於是壽先生客淡水久。其胥徒皆故熟習。其士民皆故信服。頤指目語。精神響答。潛糾義兵。風雨倏合。出不意。就同知廳事。駢斬留守賊三十六人。即日閉城門。為朝廷守。賊聞大駭。悉衆反攻。先生部

勒其民。日夜登陴。樵蘇旣斷。發屋掘鼠。得聞輒出。選鋒擊賊。有死者。明年五月。賊稍引却。道路通。署同知徐夢麟。始以印至。次第招安白石湖。勦洗金貂尾寨。擒叛官彭喜。一切倚先生為辦。是時與文負隅。據大里杙自固。我兵環營。其外疑莫敢入。先生不勝忿。謂夢麟曰。賊介恃其衆。今日戰。明日戰。可勝殺乎。不如入也。速入取其首。餘將瓦解。夢麟以其言上書軍門。不報。三請。然後得。指麾由大甲分六路進攻。先生別以若干人。由西路入。而鹿港之兵。遷延失期會。既入。無援。馬蹶被獲。賊恨先生久。至是大喜。相與攢刃支解之。時先生年七十有一矣。又明年。嘉勇郡王渡海。檻與文斬京師。臺灣平。有旨贈先生知縣。陰其子聰一官。

見王芭孫淵雅堂集。

吳鈞翁春

吳鈞字陶宰。自號曰玉田生。江蘇華亭縣人。其曾大父懋謙。以能詩有名國初。世謂之華萃山人。至是百餘年。而鈞復用布衣稱詩。鈞生平不應舉。不知家人生產。所好讀書。旁通天文。勾股金石篆隸刻印之術。而尤自力為詩。歌古文辭。其於文好深湛之思。於詩不苟作。務自矯厲。不同俗。性介潔。時時為人教小蒙童以食。有一子三女。無完衣。所居梅花書屋。在城東委巷中。詭垣塌井。鈞處之浩然。不輒受人一錢。人亦不

敢輒餽之。華亭自明入本朝。代有聞人。文章氣節。翰墨昭一世。鈞生衰絕之後。憫傷鄉先生風流墜地。文獻軼亡。乃日曳敝履。蹙蹙問巷間。訪尋遺文。渝墨故紙。手自編寫。人各為傳。欲用漢唐人總集之例。悉錄當時撰著。勒成一書。以為掌故。未及成而卒。年五十四。鈞雖靜退。足迹不出數百里。交游不過五六輩。無由自發其恢奇。然既讀書。考論天人之際。究觀今古。其氣耿然不可下。又頗近酒。酒酣。謔音輒以誚其坐人。莫識也。既以窮死。縣人乃掇拾其所為。獨樹園詩。鼠璞詞。各一卷。為刊版以行。鈞故寡與。獨與其同縣翁春交善。翁春字曙鳩。一字辨登。亦字澹生。別自號石瓠。不知其家世。小時與母沈居北郭外。菜花溼。挑菜自食。偶過里塾門外。里塾兒負課。春為誦之。如流水。塾師怪問。則曰。顧常往來。聞師教讀。習之耳。指其字。初不識。春便從塾師乞問。大義歸。而以意推測。句讀遂自能讀書。又別丐市肆。棄筆。從牆壁間畫字。人以是誇詫之。聞於縣貢生姚培謙。姚故以著述自名。家多藏帙。奇愛春界。以所宜讀書。且周給之。使卒學。已而里人沈大成致之門下。講以所聞。遂能詩。於詩好元人。不言李杜。於作字。好孫過庭。其為人耿介。與鈞相似。博覽感激。豪宕不如鈞。而周謹亦過之。對客清坐。如木佛。寡言笑。有招之飲。靡不往。歲常拜培謙大城墓下。與其里人沈

梅相交懽。餘三十年。生館其家。死殯其室。梅亦雅操士也。先時大學士諸城劉公。以侍郎督視學政。行縣聞其名。欲見之。不可。公乃手書為卷以贈之。旁縣王侍郎昶。中歲假歸。禮先於春。春亦莫逆也。性篤孝。善事其母。不娶。無子。有同產弟。不知書。其故人門弟子。相與葬春。并葬春母。又哀校其所為賞雨茅屋詩四卷。與鈞詩偕行於世。

見王芭孫
淵雅堂集。

錢繼升

繼升。錢氏昌。其名也。居吳江之保障里。今屬震澤。崇禎八年。以選貢授郡通判。不就。歸。是時天下多盜。而含山盜最桀惡。繼升家饒於財。一日。有二人踵門云。奉主命。貸銀數千兩。必得以返。詢之。乃含山所遣也。繼升勞以酒食。為好言慰之。曰。銀不能卒備。幸緩數月。當齎至山中。其人約期而去。繼升念曰。盜不可藉之銀。且豺狼無饜時。不如以家之所有。募士守禦。庶幾全吾鄉里。因具狀請於官。得便宜從事。乃立格募兵。歲方饑。聞者先後至。家有木仆地。繼升言於眾曰。能舉此本者留。未幾。有崇明武學生黃扶搖等四人至。皆黃姓。號曰四黃。遂命訓練曹伍。里人吳彥康等。亦別集壯丁自衛。皆聽繼升指麾。含山盜惡。繼升負約。率其黨至。鉦鼓喧闐。若甚可畏者。里中武

士皆持兵。鼓弓指之。盜惶駭。詭言吾曹欲往木瀆取糧。不過假道貴邑。何紛紛為。繼升使謂之曰。爾既無意侵掠。何不藏爾兵器。盜不得已。舉兵器斂之。繼升縱兵奮擊。盜殲焉。久之。盜有尤判者。乘大舟。擁黃蓋。駐野泓蕩。聲言欲為合山報仇。繼升兵少。力不敵。時職方主事吳公易。以兩都失守。倡義起兵。有眾數千人。因抵職方。借其兵。職方初難之。卒與舟師二百。而黃扶搖等率之以歸。繼升偵判船設砲。患之。遣人偽為乞人。至其船丐食。潛以鹽酒滴破中。及判發。破皆不起。繼升用砲壞其船。遂獲判。先是扶搖獻計。謂盜來必乘舟。舟必蔽以葦席。若用絲附條。而灼膏射之。則糜爛矣。從之。於是盜船盡焚。煙焰四起。李膏藥者。判黨之勇者也。繼升與搏戰。幾殆。有許某者。斬膏藥。懸其頭溪橋。繼升乃徐訊所獲之盜。殺其素為盜者。赦其脅從者。頃之。盜復夜入里中。不遂。自是不復至。閩藩聞繼升名。使以禮聘。謝不往。而吳職方敗走。大軍購之甚急。跡及繼升。繼升與吳彥康皆被逮。繼升有辭。得免。并彥康亦免。繼升與弟威皆能文。威中順治丁酉鄉試。以同榜有事。謫甯古塔。繼升亦牽連。至京師。病卒。

見張士元嘉樹山房集

鄧觀灝

鄧君觀灝。洋鄉故家子。幼有至性。隨父悔庵公官京師。師授詩。至蓼莪。輒泣。人異之。父遷蜀。提刑以巡鹽舊案。逮還論死。賴朝恩矜緩。繫圜三載。灝夙有句贖志。父慮其無濟也。漕督楊勤敏公。諗乃公為吏郤清介。官當不以貪敗。為灝謀者屢。乃徧走齊鄭燕趙間。嘗夜墮叢莽。狐鬼嗥嘯相逼。一僕劉章。阻勿行。弗顧。遇獵火出。馬聞闕。抵京。訴步軍統領阿果毅公。叱曰。爾擅入禁地。不畏死耶。命繫暗室。君度父無生理。誓自殞。守者一武弁。聞哭聲。詢故。義釋之。他日。復伺間。訴於相國傅忠勇公。及阿公馬前。傅語阿曰。禔子昌。謹救親。難能也。宜上請。阿亦惻然。二公取其辭入奏。得旨准贖。傳遣飛騎為孝子賀。蓋深重之也。納餒入。父獲免。見劉鳳詒存悔齋集

周書昌

周先生永年。字書昌。濟南歷城人。結茅林汲泉側。因稱林汲山人。先生衣服飲食。聲色玩好。一不問。但喜買書。有賈客出入大姓故家。得書輒歸先生。凡積五萬卷。先生見收藏家易散。有感於曹石倉。及釋道藏。作儒藏說。約余買田築借書園。祠漢經師伏生等。聚書其中。招致來學。苦力屈不就。縣令胡德琳。延先生與青州李文藻同修歷城縣志。卽出其書。肆力搜討。既成。學士朱筠。目以詳慎。後成進士。欲入山治儀禮。

被徵纂修四庫書。授翰林院編修。文淵閣校理。當是時。海內學士集輦下。皆欲納交。投刺踵門。然深相知者。新安程晉芳。歸安丁杰。餘姚邵晉涵。數人而已。借館上書。為四部考。傭書工十人。日鈔數十紙。盛夏。燒燈校治。會禁借官書。遂罷。先生於經史百氏之言。覽括畧盡。觀其大義。讐章不句。自謂文拙。不存稿。故歿後無傳焉。晚見桂馥學集。

吳大始

吳君諱宗元。字大始。號岱芝。浙江石門縣人也。少敦至性。砥節勵學。以歲貢生終。嘗遊省會。天台齊息園師主教敷文書院。執經從焉。書院居萬松山頂。有一樓居。極高。虛君榻其上。每日讀經史雜文。至午刻。則始去。取工部全集朗誦之。聲徹遠近。每首必百過。隨以丹鉛。率至夜分。屏止。次日復然。先是君熟於明詩綜。所作詩。酷肖高青邱。李崆峒諸家。嘗錄以正於息園師。評點訖。謂曰。詩儘佳矣。百尺竿頭。可進步乎。李杜韓蘇四家外。勿寓目可也。自是遂專志杜陵。性奇偉。不羈。不好與凡人儔伍。嘗與朱笠亭。沈雲樹。蔡漫叟諸先生相唱和。餘弗顧也。嘗言吾少時。曾作一圖。橫劍三尺。南華翁居左。指說之一虎。士類荆軻者。居右。聳聽已居中央。作撫掌大笑狀。名曰說劍圖。其雄致如此。既專精讀書。不下樓者月餘。忽值意有所會。輒入西湖山中。經宿。

不返。每談及浙東山水如天台雁宕赤松四明諸勝輒勃勃然欲往然卒不果以老親在堂故也。自壬午至甲辰迎饗獻賦者三。受知於寶東臯李鶴峰錢稼軒諸學使。復攜詩質於沈歸愚先生。名稱籍然屢擯棘闈。一不以介意。謂子侄輩曰。吾以勵汝曹耳。通塞之故命也。亦時也。吾不得而知之矣。中年後頗出游。南浮嚴瀨北抵燕臺。東至登萊瀕海諸郡。游蹤所至慷慨懷古。一寓於詩。客囊如葉不計也。歲戊申子文照領鄉薦赴都門。君欣然束裝同往。泊舟京口。抵焦山大雪忽作。遂冒雪登岸。冰凝路滑。截雙竹作杖。歷崎嶇而上。懸崖水著長二三尺許。拂之鏗然有聲。乃觀周鼎讀瘞鶴銘。謁焦先生像。俯眺海門。周覽嵯壑。比返舟中。已濕透重綿矣。其豪曠好游。蓋天性然也。鄒曉屏先生聘入山右學使幕。得一佳卷。輒朗誦不去手。素不讀律。而明敏有斷制。鄒公每以大業相質。未嘗不心折。晚歲家居。栽花課孫。里中以詩文就正者踵相接。有片長津津樂道。預修嘉興府志。表揚節義。不下百餘人。精醫理。頗諳內典。耽心禪悅。手輯四十二章經。施諸寺院。蓋閱歷既久。進詣益精。從前雄傑之氣。爾時淡泊之神。不知者謂為殊趣。在君則一以視之而已。歲庚申七月初十日微疾正

襟端坐而逝。年六十九。有南樓稿若干卷。

見戴殿四風希堂集。

吳祿室

吳翁名祿室。字在中。涇縣茂林都人也。父一橋。早卒。母楊氏。遺腹生翁。家貧。屢讀。有戚某。攜之至南邑。為人裹質。庫事會計。旁午無少閒。念念不忘母氏。一夕薄暮。陰雨中。蒼頭持書至。翁色變。以為吾母病矣。啓緘讀之。信然。即擬疾馳歸。其肆主慰之曰。君固當速歸。奈大雨如注。何。翁不聽。持燈就道行。至次晚。則前溪阻隔。大水汪洋。求一筏不可得。天愈昏黑。居人動色。以公無渡河為戒。翁曰。不念母。何以子為。燭跋易以新。光散亂。不甚明。遂脫衣履。擎諸手。徑衝波去。初祇沒脛。愈進愈深。至中流。燈失。水沸騰。直際頸領。翁號泣曰。天不使我見母耶。俄而身體上竦。浮出水面。兩足跟如有物度之立者。忽撞入淺瀨。則安然登岸矣。旋着濕衣履。魁行。踉蹌抵其家。叩門入省母。母曰。苦我兒矣。日者言我年盡五十一。今已及矣。忽得腫脹疾。飲藥無效。殆將不起耳。有頃。醫至。診視訖。曰。疾不可為也。翁聞之。痛迫於中。俯首雨泣。旋閃入厨下。袖一刀。詣無人處。以口嚙左股肉。得肉寸餘。轟切如泥。暗投烹鼎。雜諸羹。以進。母噉之。疾頓瘳。自後更二十有一年。至乾隆乙卯。母始卒。初翁受創後。痛而踣。半晌時。強起。漬血痕。裹以布巾。甫畢。鄰人見翁神色異常。時詢之。不告。以實。嗣後見翁舉

臂無力。且不時病。伺而觀其裸。堅詢始知之。仍戒勿洩。見朱龍集

許剛中

君諱穆宗。字剛中。號履亭。姓許氏。世為海寧人。早失父。家貧。乃輟儒業。習賈。無一椽之居。賃屋於吏部橋南。奉其母。而身往來吳越間。嘗雪夜步行百里。并日而餐。母供養備已。而家日裕。作室龍山之麓。橋名其堂曰經德樓。曰萼樓。塾曰汲修。以孝友忠信教其子。延名師誨之。學皆克有成。君貧時。嘗夜得遺金於途。伺其人而還之。為人賈。有誤畀以五十金者。數百里返之。其營宅也。里人有將構廈者。潛以骨一罌。寘其下。君見之。惻然。命改地。瘞之。加蓋薦焉。其人大感愧。一夕移之去。且詣君謝。君終身不言其人。嘗就相人相。曰公瘦形鵠立。音聲越然。身有二十餘子。如丹砂。法當立其家。然有大厄。今且至已。孰視指之曰。此所謂陰陽文免矣。未幾鄰家火。火延三十餘家。比至經德堂。風返火息。有於火中見神人。五導火行。至君之屋而沒。羣以為陰德之致云。見張惠言茗柯文集

僧如鵬

如鵬不知其何處僧。宋先生大樽遇之天台。則以為台山僧矣。舊傳台山中虎不噬

生肉麋鹿見人不驚。古以為佛國。諸老僧多葷茅居之。狀甚癯。問其年。搖首不答。與之金帛。無受者。是既可怪。今聞如鵬。偉然七尺軀。目如巨星。語纒纒。喉舌如古吐。今何為而亦於是邪。入其茅。不設門戶。聞其吟聲。石裂而谷響。紙稿投大鐵甕。人鮮得見之。天下僧寺。天台方廣尤多。度前代大藏佛書。如鵬借之觀。期月以徧。茅中無食具。日或飲一甌水。盡一溢米。或數日否。其貌益壯。豈不更怪矣哉。見陳斌白雲文集。

何梅生

君名承先。字梅生。甘肅武威人。幼而夷曠。邈然高厲。嗜讀書。熟于注疏。尤精綜史。漢凡鄭賈之說。顏李之注。皆言之鑿鑿。如以弗貫肉。乾隆乙卯鄉試。經題為詩小戎首章之前六句。典試者苦不得佳構。從落卷中。搜獲君文。考據獨詳。數激賞之。視所謂四書制義。皆超逸。非俗手可辦。乃拔第一。為解元。時典試者。湖南羅翰林修源也。得君喜甚。延譽公卿間。而其名日起。嘉慶乙丑成進士。改庶吉士。戊辰散館。授知縣。官福建長泰。君於事。御之以簡。時或登山臨水。賦詩自娛。而尤湛于酒。庚午調南安。未抵任。病卒。繼君任者。曰鳳。有神降其署。畫字槃沙中。為詞一闕。署梅生。眾懼曰。梅生先生來也。先生喜飲。曷飲乎。則又書曰。予為廬江城隍神。將至某處。鞠業。忽忽不暇。

飲見張樹養
素堂集

沈屺望

沈祖惠字屺望號虹舟烏程之馬要人父在戔贅吳江平望李氏祖惠生而母卒育於外王父母仍為外氏贅壻外氏無嗣因冒李姓乾隆壬申領解第一其秋會試第二改復沈姓除江西高安縣知縣祖惠殫精帖括弱冠有聲屢困場屋年三十四游陝甘學政幕中始銳意詞章為西征賦兩年乃成賦既脫稿并自注合一萬五千六百四十許字賅洽闕深上揜潘岳交河王侍郎蘭生曰千餘年鉅製也其詩亦各體穩稱五律尤高渾峭拔逼真唐音年四十一而倦游以帖括授徒鄉里潛心理學厭薄詞章先時黨本棄之敝屣與並世名流絕不通聞問並世名流亦鮮或稱道之登第後為四書講義自負理學正宗復不為時論所重以故祖惠畢生無詞章名亦無理學名及卒其高弟子王元文蒐輯遺詩得三秦游草四卷洞庭游草一卷拾存草二卷經進草一卷謀付梓不果余得之合編為虹舟集見嚴可均
鐵橫漫稿

吳星萃

吳君諱星萃字東聯陽湖馬蹟山人父桂枝以名進士為經師受業弟子數百人修

撰金先生榜。太保大學士董公誥其尤著也。君未冠即補學官弟子。已而依董太保於京師。凡客京師三十年。屢試不售。欲南旋。因循不果。年未三十。即喪婦。無子。亦不更娶。有友人姚君者。官曹縣令。請於太保。偕君而東。嘉慶十八年。林清之黨將為亂。金鄉令吳塔捕得崔士俊。即羽檄各縣緝賊。至曹。姚令不之信。君力陳利害。並為設鉤。致方略甚具。姚意稍動。而更役多賊黨。奔告其魁。知事洩。遂先期攻縣署。入之急求得君。叱曰。勸令捕我輩者汝耶。君曰。然。恨令早不聽我言。使汝曹搗滅至此。吾年七十有二。豈畏死耶。賊益憤。攢刺之。被數十創。姚令一家亦遇害。賊去。有營兵數輩至。君臥積屍中。見之。呼曰。吾已無生理。幸加刃。令我即死。兵憐之。為斷氣管。乃絕。吳塔既得崔士俊。旋誅其黨數十人。金鄉獲全。遣人開行。求得君屍。棺斂如禮。請以君名附奏得旨。入祀忠義祠。見陸繼翰崇百藥齋集。

樵煙野客

盛子履有樵煙野客傳云。樵煙野客者。居於韜光靈隱之間。丙子秋。余過西湖冷泉亭。憩飛來峰下。聞呼猿洞口。有吟聲。攀崖入。有屋數椽。童子倚門。余問吟詩者誰。不對。請見不許。固強之。乃導余入。松毛為籬。藤蘿屈曲。屋小而深。筆牀茶竈。位置整潔。

一客凭几而吟。年六十許。頎然秀削。清而不枯。鬢髮蒼然。衣冠甚古。揖余問所從來。余曰。聞吟聲。故來。客曰。余不知詩。何能吟。且請坐。命童子煮茶。談吐極清遠。其音吳音也。叩以姓氏。不答。亦不問余姓氏。余心異之。見几上真山居圖卷。自題樵煙野客。即呼之曰樵煙客。喜謂余解人。見余扇頭自書秋草詩。頗欣賞。取別紙手錄。字法秀勁。道逸於宋大家中。絕似山谷。余更異之。客呼余為秋草君。薄暝。余辭去。客亦不復留。越三日。余復造焉。則客已先坐冷泉亭。邀至舊所居處。淪茗溫酒。摘園蔬烹池魚。殷勤勸餐。笑語欵洽。酒半酣。縱談史傳。上下千古。如示諸掌。兼及文章詞賦。升降源流。羅列淹貫。而於近人著述。皆似無足當意者。余大驚。索其詩文。則皆隨手散棄。惟示和余秋草詩四首。讀之。琅琅然。瑟瑟然而頗有哀悽之意。余屢詢之。客曰。僕非逃世者流。少年亦嘗弋獵浮譽。中年人事多故。鬱鬱不樂。所居近市。往來皆駟僮。無可談者。余乃攜書一篋。放懷山水。作詩文以自娛。此處離家不過二三百里。然已六七年不歸矣。余為黯然。客曰。君可作竟日談。遂欣然留宿。自童子外。別無他僕。門庭闌然。一樽相對。意致閒暇。余又以里居姓氏問。客曰。君何俗見之。未除也。竟不告。明日。余歸。客吟孟襄陽待到重陽日。還來就菊花之句。一笑而別。翌日。余復往。則落葉滿

階。蓬門深掩。立於叢篁雜樹中。見水聲潺潺過澗。一僧從澗後出。余問客何在。僧曰。客為誰。曰。樵煙。曰。樵煙為誰。余指其廬。僧曰。是偕童子。買小舫。載書篋。移居於雲棲寺後矣。余悵快而歸。夜不成寐。晨起策蹇孤往。歷梵村。入雲棲深處。徧問之。茫然不知山中有是人也。見盛大士蘊素閣集。

王瘦山

瘦山王氏。諱熾。字緝熙。華亭人。家赤貧。瘦山刻苦讀書。為學官弟子。授徒養其母。道光三年。夜靈雨。江以南皆澤國。松江尤甚。斗米錢五六百。瘦山脩脯不能餬其口。然堂上甘旨無少缺。未幾疫大作。母遺疾不起。不克斂。貸三十鎰。始成喪。然後不盥洗。不寢息。埃垢積首。泥生髮膚。搏膺而呼。悲酸結塞。一日。天未明。憑棺慟哭。退而自書曰。不孝子王熾。生無以為養。死無以為禮。以親喪故。累人不如死。即潛入後舍。督其扉。扉臨河。自投於河而死。平明家人起視。後舍扉啓。庭中闐無人。大駭。適買棉紗人來曰。吾見南門大張涇東岸白楊樹下。有一尸。麻衣草屨者。此其是耶。急覓之。則瘦山也。面如生。戚族賻以斂。皆痛哭。買棉紗人亦大哭。有吳司訓惕庵倡義葬其母。并葬瘦山。卹其寡稚。月如千錢。見盛大士蘊素閣集。

許所望

許所望字叔翹。安徽懷遠縣諸生。工為詩。而通兵法。喜慷慨。趨義。嘉慶壬戌冬。宿州亂。民王朝民。李勝才。破宿州。所望嘗率其戚屬王冠英。出積粟三千石餉軍。且助平賊於陳家集。嘉慶癸酉秋九月。河南亂。民李文成據滑縣。內結林清。驚京師。其黨走山東。林清既伏誅。山東平。王師方會圍滑縣。兩江總督百齡駐徐州。安徽巡撫胡克家駐亳州。為江南防守。亳州有歸德人楊七郎者。盜魁也。擁眾引河集。其黨洪廣漢據保安山。與潁州亂。民沙占魁等互勾結。伺隙未動。胡中丞知所望名。以書招之。使帥鄉勇助防。勦所望集。邱惠齡。張國綱。謝崇訓等十一人為隊長。率八百人至亳。乃畫策曰。楊七郎猛且狡。聞吾在軍。備且密。宜計誘之。命張國綱。謝崇訓率健兒八人。偽為逃正。投詣楊。楊果喜。越五日。誘至邱家集。楊忽疑曰。若為許所望來耶。時楊眾百餘人。崇訓出不意。斷楊左臂。眾大驚。張國綱疾呼曰。吾張國綱也。立刺殺數人。國綱萬人敵。與邱惠齡同攻破宿州城者。賊素震其名。遂大潰。所望率兵至。賊黨擁七郎奔。或謂七郎死于路云。於是保安山。洪廣漢眾亦大潰。沙占魁等竄至永城白廟。所望追殺數人。會滑縣平。其餘黨來合。與亳賊南焚會亭。所望戰於公基湖。令列十火。

鎗土埠上。曰賊至二百步發。令衆伏地勿動。曰鎗發乘煙突擊之。賊大潰。追數十里。斬獲無算。亳州罷防守。蓋不煩五營一弁一卒也。當百制府防守徐州時。儀徵縣屠倖。率河南人張永祥團練鄉勇三百人。將助徐州防事。平。解去。張永祥嘗以鄉勇四百人擊破川楚賊於廬氏縣。議功補外委。張永祥不知書。而恂恂如讀書人。人呼之為張鐵鎗云。謝崇訓以功授練潭汛。所望兩辭廬鳳道珠隆阿。及胡中丞之叙功。以諸生應鄉試。見陳用光太乙舟文集。

白廷英

白君諱廷英。字嶽鍾。始祖貞。興平人。前明漢中教授。遂家洋縣之仙里村。君讀書通大義。率妻子耕作養母。中年家漸饒。七十後復閱舊書不倦。數為適人排難解紛。而無所取。建宗祠。延師訓里中弟子。纂族約家法。意巖巖不苟。乾隆乙卯。君年六十八。縣廷舉鄉飲酒之典。君力辭未與。鄉人咸謂君之齒德固無愧也。是時湖北教匪縱橫。嘉慶丁巳臘月之末。由蜀渡漢江而北。約十餘萬。蹂躪終南之南。近山幾無完村。明年戊午春。督鄉人築村後之張家寨以避寇。二月二十四日。賊陷城東雍家寨。使人馳覘之。歸報狀。君熟視已寨。曰。吾寨庶幾免乎。厥後賊數萬突從東來。鄉人望風

股粟多不敢居寨上。寨上人不二三百。賊急攻。鎗矢雨下。君戒寨上人堅守。而賊衆大呼曰。逃為善。否且屠。衆莫固志。丁壯悉由塞而墜去。賊蟻附而登。君知不免。大罵。遂遇害。君之次子。筐君頭。負去。賊逐之。筐倒。頭落山下。從弟廷才。廷揚亦抗不屈。俱戕。且焚之。明日。舉家號哭求君尸。尸焦爛不可識。以右手駢指辨得之。頭不可得。諸子號呼禱祈山靈。得於谷底。次子婦李氏。同日刺死。又殺其二孫。寨之將陷也。有健者以石碎賊之腦。立死。或曰。君之姻黨張清。或曰。君之從孫德助之。從子文翠。被脅不降。至寨西廟墜子。縛梧桐下。刳其腹。梧桐由是立枯。見岳震川賜萬堂集。

魏興

興安新城城隍廟旁。有孝子。曰魏升。父成祥。母張氏。生二子。長魏興。次繼宗。成祥早歿。皆充伍鎮營。嘉慶二年。繼宗戰死。龍王溝。興以母年將八十。貧不能娶妻。遂退伍。樵傭以供母。嘉慶五六年間。歲凶。斗米過千錢。嘗易米為母作餐。而私食糟糠。腹常不果。今興年六十九。無以養。拆屋半間。賣瓦木易米。又賣屋後柑樹。安康廩生張鵬翼聞其事。欲親見狀。晨訪之。託言買柑樹。將入門。興阻之曰。母尚未起。令鵬翼從牆外望見焉。入門炊爨。了無欺曲。鵬翼往新城。每日自塾歸。過其廬。輒私窺之。見

魏興侍母。左右扶持。問燠寒。如孩提狀。因問其鄰童子。魏叟與其母。日何食。童子曰。興喫包穀。麩其母所食。麥麩也。鵬翼訝興目不識丁。人方厭其龔慈。事母乃能如此。方其壯年。能樵傭易食。今年衰。不賣屋樹。何待賣屋樹後。又何物奉母耶。知府上元葉君莅任。鵬翼上書言其事。請以粟周之。葉公從所請。每月禮賜之粟。繼又捐廉為之區處。作長久計。使興母子飽餽以為常。見岳震川賜萬堂集。

徐金霖

徐金霖字翔千。號相坡。為長洲諸生。世居吳縣洞庭之東山。野人以徐夫子稱之。欽其行也。居父喪。哀毀骨立。母嚴太孺人。以悲痛成心疾。往往喜怒失常。嘗終夜不睡。惟聽人歌始睡去。公於是令諸婢皆習歌。時或怒。盡斥諸婢去。命公及其弟諱文鵬者。歌公不能歌。取古詩曼聲誦之。弟為之和。又以弟體弱。恐其以勞致疾。因請曰。是愚且音不佳。不如我善歌。太孺人領之。於是命公獨歌。每夜深。諸婢睡熟。公獨嗚嗚不已。輒至達旦。或命之舞。輒奮袖低昂。作拍張狀。見顧純集。

汪良緒

孝子姓汪氏。名良緒。字纘武。吳江人。世居城中。其父邦楨。以好博破家。母張氏。直諫。

忤意為所逐。孝子日夜號泣求返其母。父怒并逐之。於是奉母至平望之戰河。依其妻父王某以居。久之。父窘困不能自存。亦來依其子。初汪氏本素封。張亦饒裕。母雖被逐。尚攜其奩中物。值數百金。孝子為置田四十畝。以供養饒。至是父又盡斥去其田。乃貧無立錫。惟賴孝子館穀以養。然孝子奉事惟謹。即與他人言。未嘗一語以父為非也。暑月多蟲。為父置帳。輒繫之以償博進。孝子撤己之帳。以與父。父又繫之。如是再四。孝子無如之何。則亦裸卧飽蟲。晨起。蟲跡斑斑。然徧其體。其妻欲為之假帳。度夏。孝子感然曰。吾父無帳。吾其忍安寢乎。其母抑鬱多病。孝子親侍湯藥。未嘗稍離母。歿之歲。適館他所。聞母疾作。亟歸而河冰合。舟楫不通。徒步數十里。值津渡處。履冰而過。見者皆股栗。蓋急于視母疾。不自知其蹈險也。其居母喪。哭泣無常。朝夕則寢地不稅經帶。雖寐必屢覺。覺則連呼阿母不止。鄰人聞者皆為流涕。如是久之。遂以毀致病。未及終喪而歿。歿後人視其枕。則以麻布包土塊也。年二十有八。無子。一女尚幼。孝子能為詩及古文。有遺稿若干首。

見顧汝敬
研漁莊集。

壽州某孝子

壽州某孝子。生而父以歲凶出謀食。遂不返。孝子長。母告之。既貧。且足跡未嘗出里。

聞漠然無可為計。見其鄰有招魂者。私念虛空可以神氣致。乃於人靜後。登野橋。四面呼父。半年後。聞一函似有應聲。益疾呼之。又數月。聲漸近。久之。若咫尺。乃問曰。吾爹耶。爹安在。曰。吾死矣。循聲往。骨可得也。明日。裹飯而往。循聲行。竟夜三四十里。比曉而宿。逮夜復行。三數日。聲止不前。比曉。乃詢其里人。言姓名狀貌。僉曰。是某也。死四五年。已瘞某所。因發而抱其骨以歸。母方以孝子不返。屬里中求之。而孝子已負父骸至。乃大駭。羣稱孝子焉。嘗授州中人。令補載州志。久而忘其姓名矣。見李北洛養一齋集

浦近倫

浦孝子。名恒。字近倫。常熟縣東北鄉。曰福山鎮。瀕海而俗犷悍。浦氏獨柔愿。至孝子。尤恂恂。如不勝衣。家貧。販於江北。一夕心忤。曰。吾父殆病矣。急航海。颶風陡作。檣帆摧折。前舟俱覆。榜人不知所為。孝子自操舟。徑渡。父果病亟。孝子事醫。晷目不交睫者十晝夜。刲股進之。竟獲瘳。又數年。乃卒。孝子縛草墓側。日負販養母。夜則宿草舍中。值風雨。嚴坐達旦。人多憐之。孝子弗顧也。孝子年六十餘。每祭。奉栝椽。未嘗不泣下。嫁其兩妹。析家具三之。曰。女弟猶弟耳。方父病亟時。鄰夜火。既延及矣。孝子以身蔽父。風猛甚。火忽越廬而過。左右鄰湯如。而孝子家獨無恙。孝子父士瑜。善事母。數歲

時侍母食。日止粥一餐。士瑜食故緩。所持實空器。母察而憐之。近倫之孝。有自來矣。

見孫原相
天真閣集。

曲園居士曰。王藝齋家相。名香堂集。亦有浦孝子傳。言父病。割股以進。母病。復割股。妻王氏。竟以哭姑死。其妹當母病革時。亦割股一門。純孝。尤所難也。附著之。以補斯傳之缺。

呂德興

旌德廟首呂氏。有樵而孝者。曰德興。以鬻薪為養。性質直。與人無狎。有不可。雖衆強之。弗能得。人號之曰冷面。惟事親則融融然。所居先世遺宅。與衆十數家分室而居。一日。宅中火起。衆盡出。孝子不見父所在。亦出。出而求其父不得。則冒火復入。見其父於煙焰中。欲負以出。而火延無路。父麾之曰。我已老。不得出數也。爾隻身犯火。可脫。顧我俱死。何益。孝子泣曰。父在火中。子焉有出之理。遂以身擁衛其父於所居室中。俄而室之四周盡燬。而此室獨完。孝子與父均無恙。人見其冒火入也。曰。是必死。相與歎息。見室未壞。異之。既得其狀。則皆曰。天相孝子。天相孝子。事在康熙十七年。今其室尚存。村人咸目其地曰火羅圈。室曰孝子居云。見董柱敷
自如室集。

戴兆奉

旌德留村有戴孝子名兆奉。縫人也。少隨其父以縫衣為業。年十三。母歿。哀毀異常。兒以父故。時自節抑。每忌日生朝。則慘泣踰日。事繼母如母。既娶。常執業隨父。不離左右。父病。噓。孝子亦自減飲食。百計求所以療治者。不得。則剝肱肉糜以進。卒不起。孝子慟甚。既葬。廬於墓。朝夕稽顙哭。聞之者為之感愴。墓距家三里許。念繼母。時歸省視。止於中堂。不入內。妻出見。但戒以善事養。語無他。及居墓者三年矣。其情如一日。里人時於暴風苦雨中。見墓所若有神物來降者。又有芝草之異。以為孝德所感云。見董桂敷自堂集

程永傳

程孝子名永傳。字子亮。小字八十官。世居婺源城西。父宗裕。服賈楚蜀間十餘年。不歸。無音問。死生莫知也。當父出門時。孝子甫四歲。家貧。年十二。即隨祖父習賈江右。既而母及祖父相繼卒。孝子年二十。乃孑身走數千里。尋其父。旅食或乏。絕。既盡楚地。入蜀。抵重慶府。詢之鄉人。容其地者。則其父實死於是六年矣。孝子慟絕。亟叩求其墓。人曰。初葬江南義冢。後有故交石某。以其地卑濕。移至高原。未審其處也。孝子

則日泣。從故葬處。躋山越阻。徧求之。不可得。返守故葬處。晝夜哭。有老僧導以禱神。如其言。依方步察。以往。距義冢蓋十數里。高阜蔓草中。一碣露出。逼視之。則其父姓氏。里居具焉。孝子跪而抱之。曰。吾父在此耶。哀號不自已。觀者為隕涕。遂啟壙。視棺前。和字符合。乃扶柩附舟東下。舟中坐卧不離柩。朝夕食必奠。遇三峽大江。彭蠡風濤之險。輒撫棺哀籲於天。既歸葬。服喪三年。於是邑中人皆稱程八十官孝子也。親

桂敷自
知堂集

江廷燦

江先生諱廷燦。字英三。號蓮峯。系出蕭江。先世自邑之江灣。遷城東。祖父以上皆未列士籍。先生少讀書。貧不能從師。諸經皆自誦。年十八。為邑庠生。乃肄業郡城紫陽書院。從方遠瀄。鄭炳也。諸先生學為時文。其文以前明隆萬啟禎諸名家為宗。尺寸理法。芟除枝葉。獨樹質幹。試輒黜。終不改。為人介直。自生徒束脩外。不妄取一錢。先生為塾師。神夷氣肅。終日不出館舍。督課有常。講書詳盡。無燕談之友。歲首末。離塾不

見董桂敷
自知堂集